

四庫全書

史部

欽定四庫全書

夢梁錄卷十二

宋 吳自牧 撰

西湖

杭城之西有湖曰西湖舊名錢塘湖週圍三十餘里自古迄今號為絕景唐朝白樂天守杭時再築堤捍湖宋慶歷間盡闢豪民僧寺規占之地以廣湖西元祐時蘇東坡守杭奏陳于上謂西湖如人之眉目豈宜廢之遂撥賜度牒易錢米募民開湖以復唐朝之舊紹興間輦

轂駐蹕衣冠紛集民物阜蕃尤非昔比郡臣湯鵬舉申
明西湖條畫事宜于朝增置開湖軍兵差委官吏管領
任責蓋造寨屋舟隻專一撩湖無致湮塞脩湖六井陰
竇水口增置斗門水閘量度水勢得其通流無垢污之
患乾道年間周安撫淙奏乞降指揮禁止官民不得拋
棄糞土栽植荷菱菱植穢污填塞湖港舊召募軍兵專
一撈湖近來廢缺見存者止三十餘名再乞填刺補額
仍委尉司官并本府壕寨官帶主管開湖職專一管轄

軍兵開撈無致人戶包占或有違戾許人告捉以違制
論自後時有禁約方得開闢淳祐丁未大旱湖水盡涸
郡守趙節齋奉朝命開濬自六井之錢塘上船亭西林
橋北山第一橋蘇堤三塔南新路長橋柳洲寺前等處
凡種菱荷芟蕩一切雜去方得湖水如舊咸淳間守臣
潛臯墅亦申請于朝乞行除折湖中菱荷毋得存留穢
塞侵占湖岸之間有御史鮑度劾奏內臣陳敏賢劉公
正包占水池蓋造屋宇濯穢洗馬無所不施灌注湖水

一以醞酒以祀天地饗祖宗不得蠲潔而虧歆受之福
次以一城黎元之生俱飲污膩濯水而起疾疫之災奉
旨降官罷職令臨安府日下拆毀屋宇開闢水港盡于
湖中除拆蕩岸得以無穢污之患官府其除年納利租
官錢消滅其籍絕其所恃本根勿復萌蘖矣且湖山之
景四時無窮雖有畫工莫能模寫如映波橋側竹水院
澗森茂盛密蔭清委可人意西林橋即裏湖內俱是貴
官園圃涼堂畫閣高堂危榭花木奇秀燦然可觀有集

芳御園理宗賜與賈秋壑為第宅家廟往來遊翫舟隻不敢仰視禍福立見矣西林橋外孤山路有琳宮者二曰四聖延祥觀曰西太乙宮御園在觀側乃林和靖隱居之地內有六一泉金沙井閑泉僕夫泉香月亭亭側山椒環植梅花亭中大書於照屏之上云疎影橫斜水清淺暗香浮動月黃昏之句又有堂扁曰挹翠蓋挹翠西北諸山之勝耳曰清新亭面山而宅其麓在挹翠之後曰香蓮亭曰射圃曰瑪瑙坡曰陳朝檜皆列圃之左

右舊有東坡庵四照閣西閣鑑堂辟支塔年深廢久則
名不可廢也曰蘇公堤元祐年間東坡守杭奏聞浚湖
水所積葑草築為長堤故命此名以表其德云耳自南
迄北橫截湖面綿亘數里夾道雜植花柳置六橋建九
亭以為遊人翫賞駐足之地咸淳間朝家給錢命守臣
增築堤路沿堤亭榭再一新補植花木向東坡嘗賦詩
云六橋橫接天漢上北山始與南屏通忽驚二十五萬
丈老封席卷蒼烟空曰南山第一橋名映波橋西偏建

堂扁之先寶歷年大資表京尹歆請于朝以杭居吳會
為列城冠湖山清麗瑞氣與人傑代生踵武相望祠祀
未建實為缺文以公帑求售居民園屋建堂奉忠臣孝
子善士名流德行節義學問功業自陶唐至宋本郡人
物許箕公以下三十四人及孝婦孫夫人等五氏各立
碑刻表世旌哲而祀之堂之外堤邊有橋名袁公橋以
表而出之其地前挹平湖四山環合景象窈深雖堂濱
湖入其門一徑縈紆花木蔽翳亭館相望五六來者由

振衣歷古香循清風登山亭憩流芳而後至祠下又徙
玉晨道館於祠之良隅以奉洒掃易扁曰旌德且為門
便其往來直門為堂扁仰高曰第二橋名鎖瀾橋西建
堂扁湖山咸淳間洪帥燾買民地創棟宇雄傑面勢端
閎岡巒奔趨水光滉漾四浮圖矗四圍如武士相衛回
眸顧盼由後而望則芙蓉菰蒲蔚然相扶若有遜避其
前之意後二年帥臣潛臯墅增建水閣六楹又縱為堂
四楹以達于閣環之闌檻闢之戶牖蓋邇延遠挹盡納

千山萬景卓然為西湖堂宇之冠遊者爭趨焉曰第三
橋名望仙橋側有堂扁三賢以奉白樂天林和靖蘇東
坡三先生之祠袁大資請于朝竊惟三賢道德名節震
耀今古而祠附于水仙廟東廡則何以崇教化勵風俗
遂買居民廢塢改造堂宇以奉三賢實為尊禮名勝之
所正當蘇堤之中前挹湖山氣象清曠背負長岡林樾
深窈南北諸峯嵐翠環合遂與蘇堤貫聯也蓋堂宇參
錯亭館臨堤種植花竹以顯清樾堂扁水西雲北月香

水影晴光雨色曰北山第二橋名東浦橋西建一小矮橋過水名小新堤於淳祐間趙節齋尹京之時築此堤至麴院接靈隱三竺梵宮遊翫往來兩岸夾植花柳至半隄建四面堂益以三亭於道左為遊人憩息之所水綠山青最堪觀翫咸淳再行高築堤路凡二百五十餘丈所費俱官給其券工也曰北山第一橋名涵碧橋過橋出街東有寺名廣化建竹閣四面栽竹萬竿青翠森茂陰晴朝莫其景可愛閣下奉天之祠焉曰壽星寺高

山有堂扁江湖偉觀蓋此堂外江內湖一覽目前淳祐
趙尹京重創廣廈危闌顯敞虛曠旁又為兩亭巍然立
于山峯之頂遊人縱步往觀心目為之豁然曰孤山橋
名寶佑舊呼曰斷橋橋裏有梵宮以石刻大佛金裝名
曰大佛頭正在秦皇纜舟石山上遊人爭睹之橋外東
有森然亭堂名放生石函橋西昨於真宗朝天禧年
間平章王欽若出判杭州請于朝建也次年守臣王隨
記其事元祐東坡請浚西湖謂每歲四月八日邦人數

萬集于湖上所活羽毛鱗介以百萬數皆西北向稽首
祝萬歲紹興間以鑾輿駐蹕尤宜涵養以示渥澤仍以
西湖為放生池禁勿採捕遂建堂扁德生有亭二一以
濱湖為祝網縱鱗之所亭扁冰飛一以枕山凡名賢舊
刻皆峙焉又有奎畫戒烹宰文刻石于堂上曰玉蓮又
名一清在錢塘門外菩提寺南沿城景定年尹京馬光
祖建次年魏克愚徙郡治竹山閣改建于此但堂宇爽
闊花木森森顧盼湖山蔚然堪畫曰豐豫門外有酒樓

名豐樂舊名聳翠樓據西湖之會千峰連環一碧萬頃
柳汀花塢歷歷闌檻間而遊撓畫船擢謳堤唱往往會
于樓下為遊覽最顧以官酤喧雜樓亦背水弗與景稱淳
祐年帥臣趙節齋再撤新創瓌麗宏特高接雲霄為湖
山壯麗花木亭榭映帶參錯氣象尤奇縉紳士人鄉飲
團拜多集于此更以錢塘門外望湖樓又名看經樓大
佛頭石山後名十三間樓乃東坡守杭日多遊此今為
相嚴院矣豐豫門外有望湖亭三處俱廢之久名賢遺

跡不可無傳故書之使後賢不失其名耳曰湖邊園圃如錢塘玉壺豐豫漁莊清波聚景長橋慶樂大佛雷峰塔下小湖齋宮甘園南山南屏皆臺榭亭閣花木奇石影映湖山無之貴宅宦舍列亭館于水隄梵刹琳宮布殿閣於湖山週圍勝景言之難盡東坡詩云若把西湖比西子淡粧濃抹總相宜正謂是也近者畫家稱湖山四時景色最奇者有十曰蘇堤春曉麴院荷風平湖秋月斷橋殘雪柳岸聞鶯花港觀魚雷峰落照兩峰插雲

南屏晚鐘三潭印月春則花柳爭妍夏則荷榴競放秋則桂子飄香冬則梅花破玉瑞雪飛瑤四時之景不同而賞心樂事者亦無窮矣

下湖

下湖在錢塘門外其源出于西湖一自玉壺水口流出九曲沿城下帶至于杭門外一自水磨頭石函橋閘流出策選鋒教場楊府雲洞北郭稅務側合為一流如環帶形自有二斗間瀦洩之淳祐年西湖水涸城內諸井

亦竭尹京趙節齋給官錢米命工自錢塘尉解北望湖
亭下鑿渠引天目山出水自餘杭河經張家渡河口達
于溜水橋斗門凡作數壩用車運水經西湖庶得流通
城中諸市民賴其利也林和靖艤舟石函因過下湖小
墅賦詩曰平湖望不極雲氣遠依依及向扁舟泊還尋
下瀨歸青山連石埭春水入柴扉多謝提壺鳥留人到
落暉錢塘定山南鄉有名湖劉道真錢塘記云明聖湖
在縣南一百步又仁和東十八里亦有此湖名之仁和

縣東北十八里有湖名曰御息故老相傳秦始皇東遊
暫憩于此故以名之縣東長榮鄉曰臨平湖前輩夜汎
湖賦詩曰素彩皓通津孤舟入清曠已愛隔簾看還宜
卷簾望隔簾當此時惆悵思君君不知三月平湖草欲
齊綠楊分映入長堤田家起處烏龍吠酒客醒時謝豹
啼山檻正當蓮葉渚水塍新擘稻秧畦人間漫說多岐
路咫尺神仙洞却迷仁和永和鄉有湖者二曰石橋湖
曰下山湖天宗門外曰泛洋湖仁和長樂鄉像光湖唐

時湖中現五色光掘地得彌勒佛石像乃建寺及湖名俱曰像光仁和桐扣山下名石鼓湖

浙江

浙江在杭城東南謂之錢塘江內有浙山正居江中潮水投山下曲折而行有若反濤水勢者以錢塘松江浦陽為三而不知浦陽在何地今當陽即錢塘江其江自古曰浙河見於莊子書中其為東南巨浸昭昭也按吳越春秋時內傳云吳王賜子胥死乃取其屍盛以鴟夷

之革浮之江中子胥因隨流揚波依潮來往蕩激堤岸
又按越王外傳云越王賜大夫種死葬於西山之下一
年子胥從海上穿山胥而持種去與之俱浮於海故前
潮水潘侯伍子胥也後重水者大夫種也恐此說荒誕
無稽不敢信以忠清廟記言之非誕也然諸家所說甚
多或謂天河激湧亦云地機翁張又以日激水而潮生
月周天而潮應或以挺空入漢山湧而濤隨析木大梁
月行而水大源殊派異無所適從索隱探微宜伸確論

大率元氣嘘吸天隨氣而張歛溟渤往來潮隨天而進退者也蓋日者衆陽之母陰生於陽故潮附之於日也月者太陰之精故潮依之於月也是故隨日而應月依陰而附陽盈虛朔望隨於上下弦息於輝朏故潮有大小焉但月朔夜半子晝則午刻潮平子地次日潮信稍遲一二刻至望日則潮亦如月朔信復會於子午位若以每月初五二十日此四日則下岸其潮自此日則漸漸小矣以初十二十五日則潮交澤起水則潮漸漸大矣

初一至初三日於十五至十八日之潮最大其銀濤
沃日雪浪吞天聲若雷霆勢不可禦進退盈虛終不失
期且海門在江之東北有山曰赭山與龕山對勢潮水
出其間也盧肇潮賦所謂夾羣山而遠入射一帶以中
投者是也若言狹逼則東自定海吞餘姚奉口二江侔
之浙江尤甚逼狹潮來聞其聲北望嘉興大山水濶二
百餘里故商舶船隻怖於上憚惟泛餘姚小江易舟而
浮運河達于杭越蓋以下有沙憚南北之革礙洪波蹙

過潮勢矣

城內外河

苑山河東自保安水門向西過推貨務橋轉北過通江橋一直至梅家橋元德壽宮之東今宗陽宮有苑山河因展拓宮基填塞及民戶包占雖存去水大渠流至蒲橋後被脩內司營填塞所不及故道今廢之久矣 鹽橋運河南自碧波亭州橋與保安水門裏橫河過望僊橋直北至梅家橋出天宗水門一派自仁和倉後葛

家橋天水院橋淳祐倉前出餘杭水門水道 市河俗
呼小河東自清冷橋西流至南瓦橫河轉北由金波橋
直北至淳和倉橋轉東合天水院橋轉北過便橋出餘
杭水門清湖河西自府治前淨因橋過閘轉北由樓店
務橋至轉運司橋轉東由渡子橋合湧金池水流至金
文庫與三橋水相合南至五顯廟後普濟橋水相合直
北由軍將橋至清湖橋投北由石灰橋至衆安橋又投
北與市河相合入鶯鴨橋轉西一派自洗麩橋至紀家

橋轉北由車橋至便橋出餘杭水門 城外運河南自

浙江跨浦橋北自渾水閘蕭公橋清水閘衆惠橋擺木

橋諸家橋轉西由保安寨至保安水門入城土人呼城

河曰貼沙河一名裏沙河 龍山河南自龍山渾水閘

由朱橋至南水門淤塞年深不通舟楫 外沙河南自

行車門北去繞城東過紅亭稅務前

廢務已北

螺螄橋東至

蔡湖橋與殿司前軍寨內河相合轉西過游奕寨前軍

寨橋至無星橋壩子橋河相合入艮山河沿城泛洋湖

水轉北至得勝橋與運河相合 菜市河南自新門外
北沿城景隆觀後至章家橋菜市塘壩子橋入泛洋湖
轉北至得勝橋與運河合流 下塘自河南天宗水門
接沿橋運河餘杭水門接城中小河清湖河兩河合於
北郭稅務前由清湖堰閘至得勝橋與城東外沙河菜
市河泛洋湖相合分為兩派一由東北上塘過東倉新
橋入大運河至長安閘入嘉興路運河一由西北過得
勝橋上北城堰過江漲橋喻家橋北新橋以北入安吉

州界下塘河 新開運河在餘杭門外北新橋北通蘇湖常秀潤等河凡諸路網運及販米客舟皆由此達于杭都 下湖河在溜水橋柴場北自策選馬軍寨牆八字橋沿東西馬塍羊角埂上泥下泥橋直抵步司中軍寨牆北一派自打水樓南折入左家橋河入江漲橋河一派自八字橋西策選軍寨神勇寨步人橋至右塘橋下折入餘杭塘河一派自西堰橋西溪山一帶至飲馬山亦折入餘杭塘河 子塘河自北郭稅務驛亭下

直抵左家橋係下湖洩水去處 餘杭塘河在餘杭門
外江漲橋投西路至餘杭縣 奉口河自北新橋至奉
口大溪 前沙河在菜市門外太平橋外沙河北水陸
寺前入港可通湯鎮赭山岩門鹽場蘇東坡嘗雨中督
役開湯村運鹽河賦詩曰居官不任事蕭散羨長卿胡
不歸去來滯留媿淵明鹽事星火急誰能恤農耕
曉鼓動萬指羅溝坑天雨助官政泣然淋衣纓人如鴨
與猪投泥相濺驚下馬荒堤上四顧但湖泓線路不容

足又與牛羊爭歸田雖賤辱豈失泥中行寄語故山友
切勿厭藜藿後沙河在艮山門外壩子橋北官塘
河在餘杭門外板橋西蔡官人塘河在艮山門外九
里松塘姚斗門通河衡店湯鎮赭山施何村河在桐
扣山水漣堰東自運河入通裏外沙河赤岸河在赤
岸自運河入通高塘橫塘諸河方興河在臨平鎮東
自運河入通像光湖赭山湯鎮

湖船

杭州左江右湖最為奇特湖中大小船隻不下數百舫
船有一千料約長二十餘丈可容百人五百料者約長
十餘丈亦可容三五十人亦有二三百料者亦長數丈
可容三二十人皆精巧創造雕闌畫拱行如平地各有
其名曰百花十樣錦七寶戲金金獅子何船劣馬兒羅
船金勝黃船董船劉船其名甚多姑言一二更有賈秋
壑府車船船棚上無人撐駕但用車輪腳踏而行其速
如飛又有御舟安頓小湖園水次其船皆最精巧雕刻

創造俱用香楠木為之只是周漢國公主遊翫曾一用耳靈芝寺前水次有趙節齋所造湖舫名曰烏龍凡遇撐駕即風浪大作坐者不安多不敢撐出以為棄物湖中南北搬載小船甚夥如

闕

船買賣羹湯時果掇酒瓶如

青碧香思堂春宣賜小思龍游新煮酒俱有及供菜蔬水果船樸時花帶朶糖獅兒諸色千千小段兒糖小兒家事兒等船更有賣雞兒湖瀝海蜃螺頭及點茶供茶果婆嫂船點花茶撥糊盆撥水棍小船漁莊岸小釣魚

船湖中有撒網鳴榔打漁船湖中有放生龜鼈螺蚌船
並是瓜皮船也又有小脚船專載賈客妓女荒鼓板燒
香婆嫂撲青器唱耍令纏曲及投壺打彈百藝等船多
不呼而自来須是出著發放支搞不被哂笑若四時遊
翫大小船隻雇價無虛日遇大雪亦有富家玩雪船如
二月八及寒食清明須先指揮船戶雇定船隻若此日
分舫船非二三百券不可雇賃至日雖小脚船亦無空
閑者船中動用器具不必帶往但指揮船主一周備

盖早出登舟不勞為力惟支犒錢耳更有府富宅家自造船隻遊戲及貴官內侍多造采蓮船用青布幕撐起容一二客坐裝飾尤其精緻

江海船艦

浙江乃通江渡海之津道且如海商之艦大小不等大者五千料可載五六百人中等二千料至一千料亦可載二三百人餘者謂之鑽風大小八櫓或六櫓每船可載百餘人此網魚買賣亦有名三板船闕等船且

論商舶之船自入海門便是海茫洋無畔岸其勢誠險
蓋神龍怪蜃之所宅風雨晦冥時惟憑針盤而行乃火
長掌之毫釐不敢差誤蓋一舟人之命所繫也愚累見
大商賈人言此甚詳悉若欲船泛外國買賣則自泉州
便可出洋迤邐過七洲洋舟中測水約有七十餘丈若
經崑崙沙漠蛇龍鳥猪等洋神物多於此中行雨上畧
起朶雲便見龍現全身目光如電爪角宛然獨不見尾
耳頃刻大雨如注風浪掀天可畏尤甚但海洋近出礁

則水淺撞礁必壞船全憑南針或有少差即葬魚腹自古舟人云去怕七洲回怕崑崙亦深五十餘丈又論舟師觀海洋中日出入則知陰陽驗雲氣則知風色逆順毫髮無差遠見浪花則知風自彼來見巨濤拍岸則知次日當起南風見電光則云夏風對閃如此之類畧無少差相水之清渾便知山之近遠大洋之水碧黑如澱有山之水碧而綠傍山之水渾而白矣有魚所聚必多礁石蓋石中多藻苔則魚所依耳每月十四二十八

日謂之大汛等日分此兩日若風雨不當則知一旬之內多有風雨凡測水之時必視其底知是何等泥沙所以知近山有港若商賈止到台溫泉福買賣未嘗過七洲崑崙等大洋若有出洋即從泉州港口至岱嶼門便可放洋過海泛往外國也其浙江船隻雖海艦多有往來則嚴婺徽衢等船多嘗通津買賣往來謂之長船等隻如杭城柴炭木植柑橘乾濕果子等物多產於此數州耳明越溫台海鮮魚蟹鮫腊等類亦上憚通于江浙

但往來嚴婺衢徽州船下則易上則難蓋灘高水逆故也江岸之船甚夥初非一色海舶大艦網艇大小船隻公私浙江漁浦等渡船買賣客船皆泊于江岸蓋杭城衆大之區客販最多無仕宦往來皆聚于此耳

河舟

杭州裏河船隻皆是落腳頭船為載往來士賈諸色等人及搬載香貨雜色物件等又有大灘船係湖州市搬載諸鋪米及跨浦橋柴炭下塘甌瓦灰泥等物及運鹽

袋船隻蓋水路皆便多用船隻如無水路以人力運之
向者汴京用車乘駕物運蓋杭城皆石版街道非泥沙
比車輪難行所以用舟楫及人力耳若士庶欲往蘇湖
常秀江淮等州多雇舸船舫船闕船飛蓬等船或宅舍
府第莊舍亦自創造船隻從便撐駕往來則無官府捉
拏差借之患若州縣欲差船隻多給官錢和雇以應用
度杭城乃輦轂之地有上供米斛皆辦于浙右諸郡縣
隸司農寺所轄本寺所委官吏專卒督催米斛解發朝

廷以應上供支用搬運自有網船裝載網頭管領所載之船不下運千餘石或載六七百石官司亦支耗券雇稍船米與之到岸則有農寺排岸司掌拘卸檢察搜空又有下塘等處及諸郡米客船隻多是鐵頭舟亦可載五六百石者大小不同其老小悉居船中往來興販耳寺觀庵舍船隻皆用紅油舸灘大小船隻往來河中搬運齋糧柴薪更有載垃圾糞土之船成羣搬運而去北新橋外趙十四相公府側有殿前司紅坐船於水次管

船軍士專造紅醞在船和沽官司寬大並無捉捕之憂
論之枝城輻輳之地下塘官塘中塘三處船隻及航船
魚舟釣艇等船之類每日往返曾無虛日緣此是行都
士貴官員往來商賈買賣駢集公私船隻泊于城北者
夥矣

欽定四庫全書

夢梁錄
卷十二

夢梁錄卷十二

欽定四庫全書

夢梁錄卷十三

宋 吳自牧 撰

兩赤縣市鎮

杭州有縣者九獨錢塘仁和附郭名曰赤縣而赤縣所管市鎮者一十有五且如嘉會門外名浙江市北關門外名北郭市江漲東市湖州市江漲西市半道紅市西溪謂之西溪市惠因市北教場南曰赤山市兒頭名龍山市安溪鎮前曰安溪市艮山門外名范浦鎮市湯村

曰湯村鎮市臨平鎮名臨平市城東崇新門外名南土門市東青門外北土門市今諸鎮市蓋因南渡以來杭為行都二百餘年戶口蕃盛商賈買賣者十倍於昔往來輻輳非他郡比也

都市錢會

銅錢乃歷代所用之寶漢唐以來天下通行宋朝開寶中錢文曰宋通元寶至寶元間則曰皇宋通寶近世錢文皆著年號景定年鑄文曰景定元寶朝省因錢法不

通杭城增造鑰牌以便行用元都市錢陌用七十七陌
近來民間減作五十陌行市通使官司又印造會子自
十五界至十八界行使至咸淳年賈秋壑為相日變法
增造金銀關子以十八界三貫準一貫關子天下通行
自因頒行之後諸行百市物貨湧貴錢陌消折矣

團行

市肆謂之團行者蓋因官府回買而立此名不以物之
大小皆置為團行雖醫卜工役亦有差使則與當行同

也然雖差役則官司和雇支給錢米反勝于民間雇倩工錢而工役之輩則歡樂而往也其中亦有不當行者如酒行食飯行而借此名有名為團者如城西花園泥路青果團後市街柑子團渾水閘養團又有名為行者如官巷方梳行銷金行冠子行城北魚行城東蟹行薑行菱行州北猪行北候潮門外南猪行南土北土門菜行壩子橋鮮魚行橫河頭布行雞鵝行更有名為市者如炭橋藥市官巷花市融和市西坊珠子市修義坊肉市城

北米市且如橘園亭書房鹽橋生帛五間樓泉福糖蜜
及荔支圓眼湯等物其他工使之人或名為作分者碾
玉作鑽卷作篋刀作腰帶行金銀打釵作裏貼作鋪翠
作標襍作裝鑾作油作木作甌瓦作泥水作石作竹作
漆作釘鉸作榱桶作裁縫作修香澆燭打紙作冥器等
作分又有異名行者如買賣七寶者謂之骨董行鑽珠
子者名曰散兒行作靴鞋者名雙線行開浴堂者名香
水行大抵抗是行都之處萬物所聚諸行百市自和寧

門杈子外至觀橋下無一家不買賣者行分最多且言
其一二最是官巷花竹所聚奇異飛鸞走鳳七寶珠翠
首飾花朵冠梳及錦繡羅帛銷金衣袖描畫領抹極其
工巧前所罕有者悉皆有之更有兒童戲耍物件亦有
上行之所每日街市不知貨幾擔也

鋪席

杭州大街自和寧門杈子外一直至朝天門外清和坊
南至南瓦子北謂之界北中瓦子前謂之五花兒中心

自五間樓北至官巷南街兩行多是金銀鹽鈔引交易
鋪前列金銀器皿及見錢謂之看垛錢此錢備準權貨
務算清鹽鈔引并諸作分打銀鑪鞴紛紜無數自融和
坊北至市南坊謂之珠子市如遇買賣動以萬數人有
府第富豪之家質庫城內外不下數十處收解以千萬
計向者杭城市肆名家有名者如中瓦前皂兒水雜貨
場前甘豆湯戈家蜜棗兒官巷口光家美大瓦子水果
子壽慈宮前熟肉錢塘門外宋五嫂魚羹湯金門灌肺

中瓦前職家羊飯彭家油靴南瓦子宣家白衣張家元
子候潮門顧四笛大瓦子丘家篳篥自淳祐年有名相
傳者如猫兒橋魏大刀熟肉潘郎幹熟藥鋪壩頭榜亭
安撫司惠民熟藥局市西坊南和劑惠民藥局局前沈
張家金銀交引鋪劉家呂家陳家綵帛錢舒家紙劄鋪
五間樓前周五郎蜜煎鋪童家柏燭鋪張家生藥鋪獅
子巷口徐家紙劄鋪凌家刷牙鋪觀復丹室保祐坊前
孔家頭中鋪張賣食麪店張官人諸史子文籍鋪訥庵

丹砂熟藥鋪俞家七寶鋪張家元子鋪中瓦子前徐茂
之家扇子鋪陳直翁藥鋪梁道實藥鋪張家豆兒水錢
家乾果鋪金子巷口陳花脚麵食店傅官人刷牙鋪楊
將領藥鋪市南坊沈家白衣鋪徐官人幘頭鋪鈕家腰
帶鋪市西坊北鈕家綵帛鋪張家鐵器鋪修義坊北張
古老胭脂鋪水巷口戚百乙郎顏色鋪徐家絨線鋪阮
家京果鋪俞家冠子鋪官巷前仁愛堂熟藥鋪修義坊
三不欺藥鋪官巷北金藥白樓太丞藥鋪胡家馮家粉

心鋪染紅王家胭脂鋪淮嶺傾錫鋪清河坊顧家綵帛
鋪蔣檢閱茶湯鋪昇陽宮前仲家光牌鋪李家雲梯絲
鞋鋪太平坊南倪沒門麵食店南瓦子北卓道王賣麵店
腰棚前菜麵店熙春樓下雙條兒剗子店太平坊大街東
南角鰕蟆眼酒店漆器墻下李官人雙行解毒丸鮑釗
營街吳家夏家馬家香燭聚頭鋪李家絲鞋鋪闕家槐
簡鋪沙皮巷孔八郎頭中鋪陳家條結鋪朝天門戴家
麋肉鋪外沙皮巷口雙葫蘆眼藥鋪朝天門裏大石版

朱家標襦鋪朱家圓子糖蜜餠鋪大廟前尹家文字鋪
陳媽媽泥面具風藥鋪大佛寺疳藥鋪保和大師烏梅
藥鋪三橋街毛家生藥鋪柴家絨線鋪姚家海鮮鋪灞
橋榜亭側朱家饅頭鋪石榴園倪家犯鮓鋪張省幹金
馬杓小兒藥鋪三橋河下楊三郎頭巾鋪清湖河下戚
家犀皮鋪里仁坊口游家漆鋪李博士橋鄧家金銀鋪
汪家金紙鋪炭楊河下青關扇子鋪水巷橋河下針鋪
彭家溫州漆器鋪沿橋下生帛鋪郭鑒產藥鋪住大樹

下橘園亭文籍書房平津橋沿河布鋪黃艸鋪温州漆
器青白碗器鐵線巷籠子鋪生絹一紅鋪薦橋新開巷
圓子鋪官巷內飛家牙梳鋪齊家歸家花朵鋪盛家珠
子鋪劉家翠鋪馬家宋家領抹銷金鋪沈家枕冠鋪小
市裏舒家體真頭面鋪周家摺摺扇鋪陳家畫圓扇鋪
自大街及諸坊巷大小鋪席連門俱是即無虛空之屋
每日侵晨兩家巷門浮鋪上行百市買賣熱鬧至飯前
市罷而收蓋杭城乃四方輻輳之地即與外郡不同所

以客販往米旁午于道曾無虛日至于故楮羽毛皆有
鋪席發客其它鋪可知矣其餘坊巷橋道院落縱橫城
內外數十萬戶口莫知其數處處各有茶房酒肆麪店
果子綵帛絨線香燭油醬食米下飯魚肉鮓醋等鋪蓋
經紀市井之家往往多于店舍旋買見成飲食此為快
便耳

天曉諸人出市

每日交四更諸山寺觀已鳴鐘庵舍行者頭陀打鐵板

兒或木魚兒沿街報曉各分地方若晴則曰天色清明
或報大參或報四參或報常朝或言後殿坐陰則曰天
色陰晦雨則言雨蓋報令諸百官聽公上番虞候上名
衙兵等人及諸司土蕃人知之趕趁往諸處服役耳雖
風雨霜雪不敢缺此每月朔望及遇節序則沿門求乞
齋糧最是大街一兩處麵食店及市西坊西食麵店通
宵買賣交曉不絕緣金吾不禁公司營幹夜實於此故
也御街鋪店聞鐘而起賣早市點心如煎白腸羊鵝事

件糕粥血臟羹羊血粉羹之類冬天賣五味肉粥七寶
素粥夏月賣義粥餛子豆子粥又有浴堂門賣面湯者
有浮鋪早賣湯藥二陳湯及調氣降氣及石刻安腎元
者有賣燒餅蒸餅糍糕雪饅等點心者以趕早市直至
飯前方罷及諸行鋪席皆往都處侵晨行販和寧門紅
杈子前買賣細色異品菜蔬諸般下飯及酒醋時新果
子進納海鮮品件等物闐塞街市吟叫百端如汴京氣
象殊可人意孝仁坊口水晶紅白燒酒曾經宣喚其味

香軟入口便消六部前丁香餛飩此味精細尤佳早市供膳諸色物件甚多不能盡舉自內後門至觀橋下大街小巷在在有之不論晴雨霜雪皆然也

夜市

杭城大街買賣晝夜不絕夜交三四鼓遊人始稀五鼓鐘鳴賣早市者又開店矣大街關撲如糖蜜餠灌藕時新果子像生花窠魚鮮猪羊蹄肉及細畫絹扇細色紙扇漏塵扇柄異色影花扇銷金裙段背心段小兒銷金

帽兒逍遙中四時玩具沙戲兒春冬撲賣玉柵小毬燈
奇巧玉柵屏風捧燈毬快行胡女兒沙戲走馬燈鬧鶯
兒玉梅花圓子槌拍金橘數珠糖水魚龍船兒梭毬香
鼓兒等物夏秋多撲青紗黃草帳子挑金紗異巧香袋
兒木犀香數珠梧桐數珠藏香細扇茉莉盛盆兒帶朶
茉莉花朶挑紗荷花滿池嬌背心兒細巧籠仗促織籠
兒金桃陳公梨炒栗子諸般果子及四時景物預行撲
賣以為賞心樂事之需耳衣市有李濟賣酸文崔官人

將宇攤梅竹扇面兒張人畫山水扇並在五間樓前大街坐鋪中瓦前有帶三朵花點茶婆婆敲響盞投頭兒拍板大街翫遊人看了無不哂笑又有蝦鬚賣糖福公个背張婆賣糖洪進唱曲兒賣糖又有擔水斛兒內魚龜頂傀儡面兒舞賣糖有白鬚老兒看親箭渡鬧盤賣糖有標竿十闕賣糖效學京師古本十般糖賞新樓前仙姑賣食藥又有經紀人擔瑜石釘鉸金裝架兒共十架在孝仁坊紅杈子賣皂兒膏澄沙糰子乳糖澆壽安

坊賣十色炒糰衆安橋賣

關

少十色花花糖市西坊

賣蛸螺滴酥觀橋大街賣豆兒糕

作膏

輕湯太平坊賣

麝香糖蜜糕金銀裹蒸兒廟巷口賣楊梅糖杏仁膏薄

荷膏十般膏子糖內前杈子裏賣五色法豆使五色紙

袋兒盛通江橋賣雪泡豆兒水荔枝膏水中瓦子前賣

十色糖更有瑜石車子賣糖糜乳糕澆俱曾經宣喚皆

效京師叫聲日市亦買賣又有夜市物件瓦中前車子

賣香茶異湯獅子巷口熨耍魚罐裏熨雞絲粉七寶料

頭中瓦子武林園前煎白腸

關

腸灌肺

關

賣輕錫五間

樓前賣餘甘子新荔支木檐市西坊賣焦酸餡千層兒

又有沿街頭盤叫賣薑豉臊皮臊子炙椒酸犯兒羊脂

韭餅糟羊蹄糟蜊又有擔架子賣香辣罐肺香辣素粉

羹攪肉細粉科頭薑蝦海蜆鮓清汁田螺羹羊血湯糊

灌海蜆螺頭齋餛飩兒齋麵等各有叫聲大街更有夜

市賣卦蔣星堂玉蓮相花字青霄三命玉壺五星草窓

五星沈南夫五星簡堂石鼓野庵五星泰來心鑑三命

中瓦子浮鋪有西山神女賣卦灌肺嶺曹德明易課又有盤街賣卦人如心鑑及甘羅次北筭子者更有叫時運來時買莊田娶老婆賣卦者有在新街融和坊賣卦名桃花三月放者其餘橋道坊巷亦有夜市撲賣果子糖等物亦有賣卦人盤街叫賣如頂盤擔架賣市食至三更三絕冬月雖大雨雪亦有夜市盤賣至三更後方有提瓶賣茶冬間擔架子賣茶餛子慈茶始過蓋都人公私營幹深夜方歸故也

諸色雜賣

凡宅舍養馬則每日有人供草料養犬則供餵糠養猫
則供魚鱗養闕則供雞蝦兒若欲喚錮路釘鉸修補鍋
鉚櫃桶上鞋修幘頭帽子補修魷冠接梳兒染紅綠牙
梳穿結珠子脩洗鹿胎冠子脩磨刀剪磨鏡時時有盤
街者便可喚之且如供香印盤者各管定鋪席人家每
日印香而去遇月支請香錢而已供人家食用水者各
有主顧供之亦有每日掃街盤垃圾者每支錢攜之其

巷陌街市常有使漆修舊人荷大斧斫柴間早修脩扇
子打蠟器脩竈捉漏供香餅炭塹并炭挑擔賣油賣油
苕帚帚竹帚篋昂鵲籠擔聖堂拂子竹柴茹紙生薑薑
芽新薑瓜茄菜蔬等物賣泥風鑪小竈兒天窗砧頭馬
杓銅鐵器如銅鉋湯瓶銅錐熨斗火鋤火筋火夾鐵物
漏杓銅沙鑼銅匙筋銅瓶香爐銅火爐簾鉤鑼器如尊
槓果盆果盒酒盞注子偏提盤盂杓酒市急需馬孟屈
卮澤斗筋瓶家生動事如卓凳涼床交椅兀子長牀繩

床竹椅柅筭裙廚衣架棊盤面桶項桶腳桶浴桶大小
提桶馬子桶架木杓研槌食拓青白瓷器甌碗碟茶盞
菜盃油杆杖櫛輓鞋檀棒槌烘盪雞籠蟲蟻籠竹炭籬
蒸籠糞箕甌簞紅簾斑竹簾酒絡酒籠筭箕炭爇炒鏝
砂盃水缸烏盆三脚罐枕頭豆袋竹夫人嬾架涼簟藁
薦蒲合蓆子及士具物件如硯子筆墨書架書鎮裁刀
書剪簿子連紙又有鐔子木梳篦子刷子刷牙子減裝
黑洗漱孟子冠梳領抹針線與各色麻線鞋面領子腳

帶粉心合粉胭脂膠紙託葉墜紙等物又有挑擔擡盤
架買賣江魚石首鮓魚時魚鮓魚鰻魚鱖魚鯽魚白鰓
魚白蟹河蟹河蝦田雞等物及生熟猪羊肉鷄鵝鴨及
下飯海腊鮫膘鴨子炙鮓糟臟大魚鮓乾菜乾蘿蔔菜
蔬菰薑等物又有早間賣煎二陳湯飯了提瓶點茶飯
前有賣饊子小蒸糕日午賣糖粥燒餅炙焦饅頭炊餅
辣菜餅春餅點心之屬四時有撲帶朶花亦有賣成窠
時花挿瓶把花栢桂羅漢葉春撲帶朶桃花四香瑞香

木香等物夏撲金燈花茉莉葵花榴花梔子花秋則撲
茉莉蘭花木樨秋茶花冬則木春花梅花瑞香蘭花水
仙花臘梅花更有羅帛脫蠟像生四時小枝花朶沿街
吟叫撲賣及買賣品物最多不能盡述及小兒戲耍家
事兒如戲劇糖果之類打嬌惜宜娘子鞦韆稠糖葫蘆
火齋郎果子吹糖麻婆子孩兒等糕粉孩兒鳥獸像生
花朵風糖餅十般糖花糖荔支膏縮砂糖五色糖線
天戲耍孩兒雞頭擔兒罐兒標兒鑼小酒器鼓兒板兒

鐸兒刀兒鎗兒旗兒馬兒鬧竿兒花藍龍船黃胖兒麻
婆子橋兒棒槌兒皮影戲線索傀儡兒獅子猫兒又沿
街叫賣小兒諸般食件麻糖飽子糖鼓兒錫鐵麻糖芝
麻糖小麻糖破麻酥沙團箕豆法豆山黃褐青豆鹽豆
兒黃糖楊梅糖荊芥糖榧子蒸梨兒棗兒米食羊兒狗
兒蹄兒繭兒栗粽豆團糍糕麻糰湯糰水糰湯丸餛飩
兒炊餅槌栗炒槌山裏棗山裏果子蓮肉數珠苦槌荻
蔗甘蔗茅洋跳山婆栗茅蜜屈律等物並於小街後巷

叫賣遇春新街道巷陌官府差顧淘渠人沿門通渠道
污泥差顧船隻搬載鄉落空閒處人家有泔漿自有日
掠者米討去抗城戶口繁夥街巷小民之家多無坑廁
只用馬桶每日自有出糞人漚去謂之傾腳頭各有主
顧不敢侵奪或有侵奪糞主必與之爭甚者經府大訟
勝而後已

夢梁錄卷十三

欽定四庫全書

史部

夢梁錄卷十四至
七

詳校官鴻臚寺少卿臣梁景陽

編修臣程嘉謨覆勘

總校官原任中允臣王燕緒

校對官中書臣袁文邵

謄錄監生臣康傑

欽定四庫全書

夢梁錄卷十四

宋 吳自牧 撰

祠祭

天子祭天地諸侯祭社稷大夫祭五祀上得以無下下
不得以僭上古之制也宋朝自郊丘宗廟社稷與大中
小三祠及土域山海江湖之神先賢名哲道德之士禦
災捍患以死勤事功烈之臣皆寵以爵命列於祀典奉
常有司歲時薦饗焉郊丘在郊會門外三里淨明院左

右春首上辛祈穀四月夏雩冬至冬報皆郊壇行禮惟
九月秋饗不壇而屋設會于淨明齋宮春夏冬遇雨亦
望祭于齋宮差宰執充獻官行事明堂郊祀歲則不重
舉饗報之禮也正月上辛祀感生帝於宗陽宮齋殿四
立日記十神太乙祀于東西太乙宮惠昭昭慶齋宮在
淨慈寺對惠昭有壇殿及燎壇夏至日祭后土皇地祇
立夏日祭熒惑立秋日祭白帝昭慶有望祭殿立夏祭
南方岳瀆立秋祭西方岳瀆大社大稷壇在觀橋東以

春秋二仲臘前一日祭皇地祇九宮貴神壇在東青門外以春秋二仲壇祭感生地及九宮貴神北太乙西南攝提正東軒轅東南招搖中央天符西北青龍正東咸池東北太陰正南天一之版位也藉田先農壇在玉津園南祀神農氏配以后稷氏以歲時祀之高禩壇在郊壇東壇祭設青帝神位于壇上南向配伏羲帝高辛帝于西面北又設從祀簡狄姜嫄位于壇下卯陞南西向北每歲春分日遣官致祭畢收徹二從祀饌弓韜弓矢

入禁中后妃以次行禮海神壇在東青門外太平橋東
祭江海神為太祀以春秋二仲遣從官行望祭禮太學
春秋二仲上丁日祭先聖文宣王配先賢充國公鄒國
公沂國公鄆國公及十哲先賢從祀七十二賢歷代賢
哲忠孝公卿武學祀昭烈武成王配留侯祀歷代忠烈
臣子

山川神

城隍廟在吳山賜額永固歲之豐凶水旱民之疾病禍

福祈而必應朝廷累加美號曰輔正康濟明德廣聖王
昭濟廟在候潮門外渾水閘西相傳為吳王夫差廟加
封曰善應安濟孚祐顯衛侯忠清廟在吳山其神姓伍
名員乃楚大夫奢之子自唐立祠至宋亦祀之每歲海
潮大溢衝激州城春秋醮祭詔命學士院撰青詞以祈
國阜民安累錫美號曰忠武英烈顯聖福安王有行祠
在仁和縣治東南隅吳越錢武肅王廟在方家峪寶藏
寺及龍山武功堂為錢文穆王廟五王俱祀焉平濟王

在浙江廣子灣累封曰顯烈廣順王順濟廟元浙江里
人馮氏自侯加至王爵曰英烈王王封助靈祐順侯英顯
于通應公廟即廟子頭楊村龍王廟是也平波祠賜額
善順廟錢塘順濟龍王賜額昭應廟並在白塔嶺之原
孚應廟在磨刀坑廣順廟在龍山惠順廟在江塘順濟
龍王廟在湯村順濟宮三侯加王爵美號曰廣澤靈應
曰順澤昭應曰敷澤加應自平濟至順濟十廟俱司江
濤神也嘉澤廟在錢塘門外二里錢武肅曾封王爵

今改封曰淵靈普濟侯水仙王廟在西湖第三橋會靈
廟在卧柳洲五龍王廟在湧金門外上船亭龍井惠濟
廟在風篁嶺美號王爵曰嘉應廣濟孚惠王南高峯龍
王祠在榮國寺後盞孟潭累封曰孚應昭順侯玉泉龍
王祠在青芝塢淨空寺內其神加封美號曰嘉應溥澤
公

忠節祠

旌忠廟在豐樂橋元在德壽宮基因建宮徙于此俗呼

三聖廟按神姓高將軍名永能綏州人姓景名崇儀思
誼晉州人姓程名閣使博古河南人元豐年間因統軍
戰殘廟食于鳳翔府和尚原後方臘寇睦禱於神凱奏
而還始封侯爵後屢有功賜廟額加號王爵曰忠顯靈
應孚澤昭祐王忠顯昭應孚濟廣祐王忠惠順應孚祐
善利王以旌忠觀洒淨主其朝夕香燈之供祚德廟在
車橋西青蓮寺南其神忠義有祠墓俱在絳州太平縣
趙村以本州淪陷之久廟廷存廢不可知降旨就抗建

廟賜額加美號陞三侯為王爵以表忠節程嬰封忠濟
王杵臼封忠祐王韓厥封忠利王靈衛廟在錢塘門側
其神因完顏宗弼侵境守臣退保赭山錢塘縣令朱蹕
領衛司十將金勝祝威率民兵戰擊以寡制衆沒于王
事鄉民感其忠義葬于近郊立祠以表死節鄉民陳于
朝省賜廟額各封侯爵曰朱宰封顯忠侯金勝封忠佐
侯祝威封忠祐侯以旌其忠烈之士也忠勇廟在行春
橋寨闕中其神姓張名玘係親衛大夫果州團練使御

營宿衛前軍統制因解海州圍歿于陳中得旨贈容州觀察使建廟賜額海州仍立廟本寨昭節廟在保民坊廟巷東王班營按二神一姓喬名元字伯仁一姓陸名軌字仲模皆襄漢人在後周時同為殿侍初宋太祖受禪駕自宣祐門入守關者施弓箭拒而弗納移步趨它門而入既受朝賀畢顧近侍曰適移門守者何人奏曰散直班傳旨降克下班又問宣祐守者何人答奏曰東三班傳旨令宣引時本班之衆知天命所歸皆引義自

殞太祖大驚趣駕臨幸慰問仍命排陣使党彥進前往
救數十人問得二不死者即喬陸二神召詰其故答
曰臣止事一主所以乞死上慰勞再四謂汝等忠孝其
班不廢且賜名曰長入祇候從其請所幸臨為前引仍
賜青紅二色帛為帽飭滿三年授保義郎出職二神既
受誓而退尋復效死上憫其忠節厚加賻恤聽本班廟
祀南渡初吳山居民不戒于火楊殿岩觀緋綠二旗現
于空中隱隱見喬陸二字其火遂息皆神之力也孝宗

曾觀本班宿房以黃羅撲門槩遂宣問何所始左右備
奏始末上嘉歎忠孝節義如此乙卯歲賜廟額庚申歲
封侯爵甲子歲加大字號曰喬封忠義威福英惠侯陸
封忠烈威德英祐侯顯功廟在保叔塔下神姓岳名仲
琚世居霍山為臨安府吏因烏珠侵境輸家資募勇士
推尉司金祝二十將充首將領兵迎敵戰死合境懷其
忠義祠于延祥四聖觀號為保稷山王鄉民申明于朝
賜廟額顯功封爵曰忠翊侯以褒其忠節耳

仕賢祠

靈惠廟在江漲橋化度寺按神姓陳名項字行嵩會稽人仕于東晉使虜留三年仗節不屈拔劍斫羈脅復命于朝歷四州刺史食邑錢塘海鹽鹽官三縣之祿死葬于高亭山梁朝封王爵號崇善宋朝賜廟額以禱雨而應初封侯累加美號進王爵曰慈佑福善昭應王且神生則忠于國死則佑于民正謂之武功忠孝節義昭著有行祠凡四十餘處矣嘉澤廟在湧金門西井城下其

神姓李名泌字長源唐朝相國鄴侯魯守杭有風績郡地苦於海汲民當鹹水侯鑿六井引西湖清水入城中始得郡民飲清水郡人德之立祠奉有香火宋朝賜廟額以褒其德矣三賢堂在西湖蘇堤奉白樂天林和靖蘇東坡三先生之祠顯慶廟在龍井衍慶寺側神姓胡名則婺之永康人兩曾尹杭有惠政在郡無江潮之患疾告于朝以兵部侍郎致仕葬龍井山其本里萬岩山有方冠聚衆夜夢紫袍金帶神人現赤幟于空中隨即

勦滅朝省褒嘉建廟賜額封賜爵顯靈侯仍賜墳額顯

應神之赫靈鄉民著于方岩矣

前萬岩作方岩則是

昭貺廟在渾

水間東江塘上神姓張名夏雍正丘人家授司封郎官為

浙漕時因江潮為患故堤累行修築不過三年輒損重

勞民力遂作石堤得保無虞民感其功立祠於江塘上

朝省褒贈太常少卿累封公侯之爵次錫以王爵加美

號曰靈濟顯佑威烈安順王祠之左右奉十潮神又有

行祠在焉婆巷名安濟廟先賢堂在西湖蘇堤南山第

一橋奉唐虞許箕公漢嚴先生吳先軍凌公晉文正范
公中尉褚公宋龍驤將軍卜莊侯范先生齊褚先生顧
先生杜先生梁太中大夫范公范先生記室褚公唐太
常卿康公褚太尉褚公禮部尚書褚文公荊州大都督
許公張先生後梁吳越武肅錢王給事中羅公宋秦王
忠懿錢公吏部侍郎郎公知制誥謝公諫院錢公和靖
先生林公翰林學士沈公太中大夫錢公龍圖學士陸
錢虞三先生祕閣吳公入行崔先生太師崇國張文忠

公孝節婦定夫人孫氏夫人虞氏孝女馮氏節婦何氏
孝婦盛氏祠側以道館扁旌德專奉洒掃潘道遙祠在
潘閭巷以宅基建祠祀之

古神祠

夏禹王廟在錢湖門城側漢留侯祠在吳山靈護廟門
漢蕭相國祠在定民坊艮山門外顯忠廟在長生老人
橋俗呼霍使君廟加封美號曰忠烈順濟昭應王周赧
王廟在錢塘崇化觀山防風氏廟在廉德朱奧申將軍

廟在臨平斗門橋北周絳侯廟即絳侯周勃也在臨平鎮福德行慶真君廟在肇元昇平里吳下世傳吳呂蒙也曹王廟在長樂像光湖南金輿村相傳曹子建也

士俗祠

顯應廟在臨安府治即淨因尼寺土地賜廟額封爵曰正祐安福使翼靈廟在府治相傳為永福鎮安王旌忠廟在天慶坊其神姓趙名延翰姓馬名仁禹並殿前指揮使左右班藝祖開基翊衛有功授節鉞贈侍中莫知

廟食於杭自何而始金華將軍廟在湧金門內水池上
神姓曹名果真定人後唐為金華令仕于錢王嘗于城
隅後鑿池名湧金邦人德之為立祠廣福廟在鹽橋神
姓蔣世為杭人樂于賑施每歲秋成之際糴穀同春夏
價增時以穀如原價出糴不圖利源如歲歉則捐穀以
予飢者神死之日囑其二弟曰須存仁心力行好事二
弟謹遵兄訓恪守不違里人立祠表其德行朝家祈禱
無不感應遂賜廟額封爵及其二弟並進侯位曰孚順

孚惠孚祐之美號也三將軍廟在潘閭巷嘉應公祠在
秀義坊通應侯廟在開道坊護國天王廟白馬神祠在
壽域坊今遷糧料院巷口故基玉仙堂在大隱坊內石
姥祠在芳林鄉吳客三真君廟在石榴園巷義勇武安
王及清源真君廟在西溪法華山一在半道紅街華嚴
菩薩廟在闕潭半邏老人廟在縣東北霸王廟在芳林
鄉會靈護國祠在端平橋東堍塘上靈休廟在城南廂
江岸真聖廟在白塔嶺半山七娘子廟在皋亭山舊傳

崇善王妹也蘇將軍廟其神東晉驃騎將軍靈應廟按
神名楊都督並崇善王闕下神也義橋崔總管廟尚將
軍廟四廟俱在肇元鄉秦王廟在天雲鄉古老相傳晉
毛寶廟也濟惠福濟二王廟在像山湖西濟惠又祠在
北葛沈村白龍王廟在臨平東山之中亦有龍祠在洞
側通靈廟即黑龍王祠在超山趙忠獻為邑宰時禱雨
有感屢應申朝省封加美號曰通靈惠應宣濟昭惠侯

東都隨朝祠

惠應廟即東都皮場廟自南渡時有直廟人商立者攜其神像隨朝至杭遂于吳山至德觀右立祖廟又於萬松嶺侍郎橋巷元貞橋立行祠者三按會要云神在東京顯仁坊名曰皮場土地祠政和年間賜廟額封王爵中興隨朝到杭累加號曰明靈昭惠慈佑王神妃封曰靈婉嘉德夫人靈淑嘉靖夫人按廟刻云其神乃古神農於三皇時都曲阜世人食腥膻者率致物故因集天下孝義勇烈之士二十四人分十二分野播種采藥至

今于世極有神功兩廡奉二十四仙醫使者是也自漢唐至今殲寇助順具有聖跡不可殫紀二郎神即清源妙道真君在官巷紹興年間建祠舊志云東京有祠隨朝立之

外郡行祠

東岳行宮有五曰吳山曰西溪法華山曰臨平景星觀曰湯鎮順濟宮曰湯村壩山梵剎俱奉東岳天齊仁聖帝香火廣惠行宮有三曰錢塘門外霍山曰在城金地

山曰千頃寺按會要真君姓張名渤血食廣德軍之祠
山始封靈濟王累加美號昭烈大帝後改封昌福真君
今加寶號曰正佑聖烈昭德昌福崇仁真君自祖父祖
母以下若聖妃若諸弟諸子諸婦及女俱錫宋朝上爵
封之然都人士庶奉祀者有禱必應如響斯答仰山二
王廟在觀橋東馬軍司西營按宜春志二神俱姓蕭自
漢顯靈世該祀典至宋功烈尤著錫以王爵王之祖父
母若妻若子若婦皆錫爵號開慶衝潭有變臨瑞至太

平皆不能前神之陰相默助居多陳于朝褒其功烈改
賜美號曰顯德仁聖忠佑靈濟王福德聖仁忠惠康王
其王祖父母以下及左右佐神并偽仰二祖師凡列祠
者咸皆賚焉顯佑廟在仁和百萬新倉西按神姓陳名
果仁字韋之晉陵人仕于隋歷司徒有叛臣沈法興謀
叛忌司徒威聲以食毒而斃其神忠憤赫靈以神矢中
法興死之唐武德間嘉其功廟祀焉封爵忠烈公梁加
封福順忠烈王至後周封帝號宋政和賜廟常州以帝

號非禮易以王爵曰福順武烈顯應昭德王仍奉詔書
馳驛賜忠祐廟傳以幣板而別為文告于行祠因咸淳
二年十二月將郊祀天地命京尹潛皋墅祈雪祥禱于
廟即降大雪歲事之際明星有爛三靈顧歆由是歲豐
四方無虞皋墅識于行祠壁以昭靈貺申朝賜爵遣吏
緘詞馳送忠佑廟及別告于顯佑行祠以表大神之顯
靈也如此靈順廟即徽州婺源靈祠餘杭立行祠者七
一在南高峰頂榮國寺有華光樓旁為射亭有角觝臺

又闢山徑而夷之以便登陟一在北高峰為景德靈隱寺後山塔廟一在錢塘門外九曲城下一在錢塘縣調露鄉靈感寺一在候潮門外瓶場灣一在候潮門普濟橋東櫛木教場側普濟寺一在錢塘縣六和塔寺南徐村新石塘宋朝賜五王美號曰顯聰昭聖孚仁福善王顯明昭聖孚義福順王顯正昭聖孚智福應王顯直昭聖孚信福佑王顯德昭聖孚愛福惠王每歲都人辦香致敬者紛紛咸趨焉順濟聖妃廟在艮山門外又行祠

在城南蕭公松橋及候潮門外瓶場河下市舶司側按
廟記姓林莆田人氏數著靈異立祠莆之聖堆宣和間
賜廟額累加夫人美號後封妃加號曰靈惠協應嘉應
善慶聖妃其妃之靈者多于海洋之中佑護舡舶其功
甚大民之疾苦悉賴帡幪廣靈廟在石塘壩奉東岳溫
將軍請于朝賜廟額封自溫將軍以下九神皆錫侯爵
曰溫封正佑李封孚佑鐵封靈佑劉封顯佑楊封順佑
康封安佑張封廣佑岳封協佑孟封昭佑章封威佑梓

潼帝君在吳山承天觀此蜀中神專掌注祿籍凡四方
士子求名赴選者悉禱之封王爵曰惠文忠武孝德仁
聖王王之父母及妃若子若孫若婦若女俱褒賜顯爵
美號建嘉慶樓奉香燈矣

夢梁錄卷十四

欽定四庫全書

夢梁錄卷十五

宋 吳自牧 撰

學校

古者天子有學謂之成均又謂之上庠亦謂之璧水所以養育作成天下之士類非州縣學比也高宗自南渡以來復建太武宗三學士杭都太學在紀家橋東以岳鄂王第為之規模宏闊金字壯麗學之西偏建大成殿殿門外立二十四戟大成殿以奉至聖文宣王十哲配

享兩廡彩畫七十二賢前朝賢士公卿諸像皆從祀每
歲春秋二丁行釋奠禮命太常樂工數人用官架樂歌
宣聖御贊贊曰大哉宣聖斯文在茲帝王之式古今之
師志則春秋道由忠恕賢于堯舜日月共譽惟時載雍
戢此武功肅昭盛儀海宇聿崇置學官自祭酒司業丞
簿正錄算共十四五員學有崇化堂首善閣光堯石經
之閣奉高孝二帝宸書御製札石刻於閣下以黑本真
於上堂之後東西為學官位主上登極則臨幸學宮奠

謁宣聖及賜諸生束帛學官齋長諭俱霑恩霈高宗朝
幸學之時曾幸養正持正二齋兩齋長諭已免解人特
與免省未免解人與免解恩例其兩齋生並免將來文
解一次太學有十二齋扁曰服膺提身習是寸約存心
允蹈養正持正節性率履明善經德循理時中篤信果
行務本貫道觀化立禮十七齋扁俱米友仁書餘節性
經德立禮齋扁張孝祥書各齋有樓揭題名于東西壓
聽之左右為東西序對列位後為爐亭又有亭宇揭以

嘉名者影紹興年間太學生員額三百人後增置一千員今為額一千七百一十有六員以上舍額三十人內舍額二百單六人外舍生一千四百人國子生員八十人諸生衫帽出入規矩森嚴朝家所給學廩動以萬計日供飲膳為禮甚豐月書季考由外舍而升內舍由內舍而升上舍或釋褐及第或過省赴殿恩例最優於此見朝廷待士之厚而平日教養之功所以為他日大用之地也太學內東南隅設廟廷奉后土氏神即土地神

朝家勅封號曰正顯昭德孚忠英濟侯按贊書相傳為
中興名將其英靈未泯而應響甚著蓋其故居也理或
然歟自是遂明指為岳忠武鄂王況鄂國已極于隆名
宣廟食增崇於命祀謹疏侯爵未正王封仍改廟額曰
忠顯神之父母妻子下逮將佐皆有命秩華以徽號宗
學在睦親坊按國朝宗子分為六宅宅各有學學各有訓
導之官中興後惟睦親一宅以諸王宮大小學教授
專以訓迪南班子弟嘉定歲始改宮學為宗學凡有籍

者宗子以三載一試補入為生員如太學法置教授博士宗輪立講課隸宗正寺掌之學立大成殿御書閣明倫堂立教堂汲古堂齋舍有六扁曰貴仁立愛大雅明賢懷德升俊武學在太學之側前洋衛建武成殿祀太公曰昭烈武成王以留侯張良武侯諸葛亮配累朝諸名將從祀學規依太學例試補月考課升名然教養之法未備下禮兵部措置立養士額置武博武諭各一員
淳熙嘉泰間主上臨幸武學謁武成王行肅揖禮學建

立成堂齋舍有六扁曰受成貴謀輔文中吉結遠閱禮
宗武學俱有學廩膳供舍選陞褐一如太學例杭州府
學在凌家橋西士夫嫌其湫隘政帥臣累增闢規模廣
其齋舍總為十齋扁曰進德興能登俊賓賢持正崇禮
致道尚志率性養心又有小學齋舍在登俊後以東西
二教掌其教訓之職次有前廊錄正等生員各齋有長
諭月書季考供膳亦厚學廩不下數千出納學闕領其
職仁和錢塘二縣學在縣左建學廟養士仁和學有齋

舍四扁曰教文教行教忠教信錢塘學有齋舍六扁曰友善辨志教行教信教文教忠諸縣學亦如之各縣有學官決有學職生員日供飲膳月脩課考悉如州學同學廩各縣學不下數百以為養士之供醫學在通江橋北又名太醫局建殿扁曰神應奉鑒師神應王以岐伯善濟公配祀講堂扁曰正紀朝家以御診長聽克判局職本學以醫官克教授四員領齋生二百五十人月季教課出入冠帶如上學禮學廩飲膳豐厚不苟大畧視

學校規式嚴肅局有齋舍者八扁曰守一全冲精徵立
本慈用致用深明稽疾

貢院

禮部貢院在觀橋西中興紀年諸郡貢生類試於各路
轉運所在州府就試紹興十年諸州依條發解將省殿
試展一年向後科場自十二年省試為準至十四年諸
州發解如故三年一次降詔自是為定制貢院置大中
門大門裏置彌封謄錄所及諸司官中門內兩廊各開

餘間廊屋為士夫試處廳之兩廂列進士題名石刻堂
上列省試賜諸貢舉御劄及殿試賜詳定官御劄并聞
喜宴賜進士御詩石刻別試院在大理寺之西專以待
貢之避規嫌者本州貢院在錢塘門外王家橋以待本
州九縣士人發解之處兩浙漕司貢院在北關門外
橋以待兩浙路寓士及有官人宗女夫等發解之處

城內外諸宮觀

釋老之教徧天下而杭郡為甚然二教之中莫盛于釋

故老氏之廬十不及一但老氏之教有君臣之分尊嚴難犯報應甚捷故奉老氏者倍加恭敬不敢褻瀆此釋氏之所不如也且在城宮觀則以太乙萬壽為首餘杭洞霄次之其他外郡如醴泉佑神集禧崇禧等觀又次焉此朝廷以待迎老宰臣執政閒居侍從卿監除提學主事之職優寵也今撫宮觀在杭者除御前十宮觀外編次于後天慶觀在天慶坊以奉聖祖保生天尊大帝香火郡家官僚朔望到任俱朝謁于此報恩觀在觀橋

南報恩坊元貞觀貢院西巷旌忠觀在豐樂橋東北以
奉鳳翔府和尚原三聖廟香火中興即伍相公廟後天
明承天即梓潼廟天竺靈應至德崇應六宮觀俱在吳
山之左右鶴林觀在俞家園景隆觀在新門外水府淨
鑑觀在清水閘玉虛觀奉三官表忠觀奉錢王五廟香
燈在龍山左右真武觀在大和寺後玉清宮葛嶺下旌
德觀在蘇堤先賢堂後雲濤上清兩宮觀俱在雷峰塔
寺之右冲虛觀在履泰鄉太清宮在龍井山景星觀在

臨平岳祠之側順濟宮在湯鎮岳宮之左右外有在城
及附郭女冠宮觀者九曰福田新興明貞神仙承天西
靖靈耀長清等宮餘外七縣首以餘杭大滌洞天即洞
霄宮也以下宮觀僅二十有三如洞霄宮者按諸志書
云自漢武帝迄唐五代至宋元一千九百餘年元名天
柱宋大中祥符年賜觀額洞霄按真境錄云宮有五洞
交局九峰迴抱千巖萬谷秀聚其中或泉飛彤廈之簷
雲鎖碧壇之角祥光神異無木返於春秋撫掌泉靈更

丹藏于翠若又有亭館者七扁曰漱玉超然稅駕翠蛟

飛玉宜霜聚仙貞挹開也自劉宋以來得道之士許謫

而下凡二十有四人耳更有神異曰搗藥一作禽蓋山

中異鳥最多僅有其一晝隱夜鳴莫得而見其聲音清

亮徹旦不絕類如杵藥之聲曰五色雲氣出于洞中高

宗脫屣萬機頤神物表遂于乾道二年自德壽宮行幸

山中駐蹕累日勅大官建蔬膳御翰書度人經以賜自

有天地即有此山殊尤之跡勝矣文忠蘇公東坡詩云

上帝高居憫世頑故留瓊管在凡間青山九鎖不易到
作者七人相對閒庭下流泉翠蛟舞洞中飛鼠白鴉翻
長松怪石宜霜鬢不用金丹苦駐顏又方干詩云早識
吾師頻到此芝童樂犬亦相迎師今一去無消息花洞
石泉空月明餘有名賢賦詠不盡詳述且如道堂者如
西湖崇真道院靈應希真道堂以下城內外約二十餘
處皆捨俗三清道友及接待外路名山洞府往來雲水
高人時有神仙應緣現迹詳于志傳矣

城內外寺院

明慶寺在木子巷凡朝家祈禱及宰執文武官僚啓建
聖節道場咸在焉仙林慈恩普濟教寺在鹽橋東寺
有萬善大乘戒壇僧尼受戒法之地太平興國傳法寺
在佑聖觀東千頃廣化院在木子巷北係群臣僚佐建
啓聖節道場及祈禱去處城內寺院如自七寶山開寶
仁王寺以下大小寺院五十有七倚郭尼寺自妙淨福
全慈光地藏寺以下三十有一又赤縣大小梵宮自景

德靈隱禪寺三天竺演福上下圓覺淨慈光孝報恩禪
寺以次寺院凡三百八十有五更七縣寺院自餘杭縣徑
山能仁禪寺以下一百八十有五都城內外庵舍自保寧
安之次共一十有三諸錄官下僧庵及白衣社會道場奉
佛不可勝紀或僧行欲建道場殿宇則持盃遊于四方
能事者幹緣不日可以成就唯道堅志願無二心耳

杭城有古僧塔者如上天竺寺有隋朝僧貞觀法師東
岡塔竹閣有唐朝烏窠禪師塔四聖觀御園瑪瑙坡高

僧塔放馬場栖貢院贊寧塔寶聖寺後山法慧大師塔
龍井壽聖僧辨和尚塔塔前有雙株海棠且僧寺
塔者如六和慈恩開化寺曰六和塔榮國寺曰南高
峰塔景德靈隱寺曰北高峰廟塔

闕

寺曰保叔塔

闕

寺曰雷峰塔曰聖果寺塔定民坊曰佛牙

塔廣化寺曰辟支塔南山延壽法顯院曰華嚴塔淨
因寺曰雙石塔大中祥符開元寺廣九里自南渡初
斥西北充軍器所作院及民居寺元有鐵塔石塔者

五又有法華塔在端拱年僧文定建千頃廣化院有慈
化大佛塔即了性塔景德靈隱淨慈報恩光孝寺各有
鐵塔乃吳越錢王取造街市有塔者如閣門裏楊府前
有磚塔巷名曰塔兒頭龍山兒頭嶺名白塔嶺嶺有石
塔存焉兒門北有軍寨門立雙塔呼為雙塔寨薦橋門
外觀音寺對有磚塔年深矣北關門外二郎廟前亦有
磚塔三橋北楊三郎頭巾鋪河岸相對有磚塔渡子橋
南兩浙運司衙橋南光相寺有雙塔立于寺前西湖三

潭立三塔鎮之餘僧庵所建塔院街市磚塔近年者不贅詳矣

古今忠烈孝義賢士墓

夏后氏之墓見於晚周女媧墳攷之自唐明皇朝天寶年至今幾四百有餘年尚存也夫陵谷變遷高深易位彼何能若是之久哉蓋聖帝明王天相神護以至於斯耳今撫錢塘仁和兩縣之古塚備錄於後唐杜牧墓在南山東南與佛日山夾境名杜牧塢是也吳越文穆忠

獻王墓在龍山之南吳越孝獻世子墓在天竺前山吳越忠懿妻賢德順睦妃孫氏墓在石人嶺下吳越王妃仰氏墓在龍井山放馬場按表忠觀碑刻載錢氏墓在錢塘者凡二十有六墓耳吳越太尉開國薛公墓在靈石山吳越給事羅隱墓在錢塘定山鄉和靖先生林處士墓在孤山杭守胡則侍郎墓在龍井廣福寺之麓都尉周仰待制周邦彥少師元絳三墓俱在南蕩山强文憲强淵明襄恪趙密等墓並在西溪欽賢鄉少宰劉匹

夫墓在真珠嶺樞密張棨墓在寶石山寺丞陳剛中墓在龍井嶺上沙盆塢儀山

闕

王趙仲湜墓在西湖顯

明寺王生時有紫光照室視之則肉塊以兩部開嬰兒在內靖康時諸軍欲推而立之仗劍以諭諸軍王自有真王其軍猶未退遂自拔劍欲刺六軍乃退約以踰月真王出衆諾言若真王不出則王當立矣王陽許而陰實疑其期未幾高宗即位于闕自後上屢嘉歎忠義如此王嘗自贊其像曰惟忠惟孝不污不苟皓月清風良

朋益友湛然靈臺確乎不朽浙西提刑龍圖周格墓在
獨角門步司前軍寨前殿撰周杞墓在徐范村之間忠
毅畢再遇墓在西溪祕閣朱弁墓在西湖丞相李文靖
墓在小隱山紫芝趙師秀墓在葛嶺花翁孫季藩墓在
水仙廟側淳固先生宋斌墓在資國寺之右忠武岳鄂王
墓在栖霞嶺下

歷代古墓

晉杜子恭墓在錢塘唐馬三寶墓在行春橋水竹塢教

場內其墓于紹興末因增廣教場惟此塚獨高大寨卒
欲去之方舉錦間墓中有黑蜂數百飛出著人不可向
而止是夕步帥感夢有一衣黃服之人曰吾錢王之子
葬此已久祈勿毀辭語甚切次早有本軍申至應夢遂
輟其役丁蘭母塚故居在艮山門外三十六里丁橋之
石母死刻木事之如生塚在姥山之東唐孝女墓在錢
塘孝女南鄉古老相傳昔有唐媿娘年十二三母病曾
剖腹取肝和粥以進母母病愈而媿娘以瘡破入風而

死里人葬于此美其孝故名曰唐孝女墓記之亞父塚
在皋亭山木娘墓在艮山門太平鄉華林里蔡塘東其
蔡汝撥庶母沈氏卒汝撥尚幼父用火葬汝撥傷母無
松楸之地嘗言之輒泣自後長成以木刻母形以衣衾
棺槨擇地葬之仍置田畝造庵舍命僧以奉晨香夕燈
鄉人遂稱為木娘墓蘇小小墓在西湖上有詩題云湖
堤步游客之句此即題蘇氏之墓也

欽定四庫全書

卷十五

夢梁錄卷十五

欽定四庫全書

夢梁錄卷十六

宋 吳自牧 撰

茶肆

汴京熟食店張掛名畫所以勾引觀者留連食客今杭
城茶肆亦如之插四時花掛名人畫裝點店面四時賣
奇茶異湯冬月添賣七寶擂茶餠子葱茶或賣鹽豉湯
暑天添賣雪泡梅花酒或縮脾飲暑藥之屬向紹興年
間賣梅花酒之肆以鼓樂吹梅花引曲破賣之用銀盃

杓盞子亦如酒肆論一角二角今之茶肆列花架安頓
奇松異檜等物于其上裝飾店面敲打響盞歌賣止用
瓷盞漆拓供賣則無銀盃物也夜市於大街有車擔設
浮鋪點茶湯以便遊觀之人大凡茶樓多有富室子弟
諸司下直等人會聚習學樂器上教曲賺之類謂之掛
牌兒人情茶肆本非以點茶湯為業但將此為由多覓
茶金耳又有茶肆專是五奴打聚處亦有諸行借工賣
妓人會聚行老謂之市頭大街有三五家開茶肆樓上

專安著妓女名曰花茶坊如市西坊南潘節幹俞七郎
茶坊保佑坊北朱骷髏茶坊太平坊郭四郎茶坊太平
坊北首張七相幹茶坊蓋此五處多有炒鬧非君子駐
足之地也更有張賣麪店隔壁黃尖嘴蹴毬茶坊又中
瓦內王媽媽家茶肆名一窟鬼茶坊大街車兒茶肆蔣
檢閱茶肆皆士大夫期朋約友會聚之處巷陌街坊自
有提茶瓶沿門點茶或朔望日如遇凶吉二事點送鄰
里茶水倩其往來傳語耳有一等街司衙兵百司人以

茶水點送門面鋪席乞覓錢物謂之齧茶僧道頭陀道者欲行題注先以茶水沿門點送以為進身之階

酒肆

中瓦子前武林園向是三元樓康沈家在此開沽店門首綠畫歡門設紅綠杈子緋綠簾幙貼金紅紗梔子燈裝飾廳院廊廡花木森茂酒座瀟洒但此店入其門一直主廊約一二十步分南北兩廊皆濟楚閣兒穩便坐席向晚燈燭熒煌上下相照濃妝妓女數十聚于主廊

樵面上以待酒客呼喚望之宛如神仙次有南瓦子熙
春樓王廚開沽新街巷口花月樓施廚開沽融和坊嘉
慶樓聚景樓俱康沈腳店金波橋風月樓嚴廚開沽靈
椒巷口賞新樓沈廚開沽壩頭西市坊雙鳳樓施廚開
沽下瓦子前日新樓鄭廚開沽俱有妓女以待風流才
子買笑追歡耳如酒肆門首排設杈子及梔子燈筭蓋
因五代時郭高祖游幸汴京茶樓酒肆至今店家倣倣
成俗也大抵酒肆除官庫子庫脚店之外其餘謂之栢

戶無賣諸般下酒食次隨意索喚酒家亦自有食牌從便點供更有包子酒店專賣灌漿饅頭薄皮春繭包子蝦肉包子魚兒雜合粉灌燒大骨之類又有肥羊酒店如豐豫門歸家省馬院前闕家後市街口施家馬婆巷雙羊店等鋪零賣軟羊大骨龜背爛烝大片羊雜鴿四軟羊攪四件有一等直賣店不賣食次下酒謂之角球店零沽散賣或百單四十七五十二三十八者是也又有掛草葫蘆銀馬杓銀大碗亦有掛銀裏直賣牌多

是竹柵布幕為之打碗頭只三二碗便行更有酒店兼賣血臟豆腐羹燒螺螄煎豆腐蛤蜊肉之屬乃小輩去處若酒力高美者牌額賣過山之名其言一山二山三山之類是也大凡入店不可輕易登樓恐飲宴短淺如買酒不多只就樓下散坐謂之門床馬道初坐定酒家人先下看菜問酒多寡然後別換好菜蔬有一等外郡士夫未曾諳識者便下筯喫被酒家人哂笑然店肆飲酒在人出著且如下酒品件其錢數不多謂之分茶小

分下酒或命妓者被此輩索喚珍品下細食次使其高
擡價數惟經慣者不墮其計曩者東京楊樓白礬八仙
樓等處酒樓盛于今日其富貴又可知矣且杭都如康
沈施廚等酒樓店及薦橋豐禾坊王家酒店閭門外鄭
廚分茶酒肆俱用全桌銀器皿沽賣更有碗頭店一二
處亦有銀臺碗沽賣於他郡却無之

分茶酒店

凡分茶酒肆賣下酒食品廚子謂之量酒博士師公店

中小兒謂之大伯更有百姓入酒肆見富家子弟等人
飲酒近前唱喏小心供過使人買物命妓謂之閑漢又
有向前換湯斟酒歌唱獻果燒香香藥謂之廝波有一
等下賤妓女不呼自來筵前祇應臨時以此少錢會贈
之而名打酒坐亦名禮客有賣食藥香藥果子等物不
問要與不要散與坐客名之散暫如此等類處處有之
杭城食店多是效學京師人開張亦效御廚體式貴官
家品件凡點索茶食大要及時如欲速飽先重後輕無

之食次名件甚多姑以述于後曰百味羹錦絲頭羹十
色頭羹間細頭羹海鮮頭食酥沒辣象眼頭食蓮子頭
羹百味韻羹雜彩羹炊葉頭羹五軟羹四軟羹三軟羹
集脆羹三脆羹雙脆羹羣鮮羹落索兒焙腰子鹽酒腰
子脂蒸腰子釀腰子茄支焙腰子腰子假炒肺雞絲簽
雞龜魚雞脆綠筍鷄鷄奈香新法雞酒蒸雞炒雞草五
味焙雞鷄粉簽雞奪真五味杏酪鷄綉炊鷄間筍蒸鷄
鷄排炊羊大骨蒸軟羊鼎煮羊羊四軟酒蒸羊綉炊羊

五味杏酪羊千里羊羊雜燒羊頭黿魚羊蹄筍細抹羊
生膾改炙羊攪粉細點羊頭三色肚絲羹銀絲肚肚絲
簽雙絲簽葷素簽大片羊粉大官粉三色團圓粉轉官
粉三鮮粉二色水龍粉鮮蝦粉朥掌粉梅血細粉鋪薑
粉雜合粉珍珠粉七寶科頭粉攪香螺酒燒香螺香螺
膾江瑤清羹酒燒江瑤生絲江瑤攪望潮青鰕蟬炬酒
炙青鰕酒法青蝦青蝦辣羹酒掇螭生燒酒螭薑酒決
明五闕決明三陳羹決明簽決明四鮮羹赤魚分明薑

螺子赤魚膘二色膾海鮮膾鱸魚膾鯉魚膾鯽魚膾羣
鮮膾燥子炒魚絲兒清供沙魚拂兒清汁鰻鱔假團圓
螺子襯腸血筒螺子麻菇綠笋螺子潭笋釀笋抹肉笋
簽酥骨魚釀魚兩熟鯽魚酒蒸石首白魚時魚酒吹鱖
魚春魚油燂春魚魴魚石首油燂鮑魚油燂假河狔石
首玉葉羹石首桐皮石首鯉魚炒鱔石首鱔生石首鯉
魚兒子銀魚炒鱔攪鱸魚清羹鮑魚假清羹鰕魚肚兒
羹鮑魚關盆鯽江魚假蜆酒法白蝦紫蘇蝦水荷蝦兒

蝦包兒蝦王蟬辣羹蝦蒸假妳茶蝦魚水龍蝦魚蝦圓
子麻飲雞蝦粉芥辣蝦蹄膾麻飲小雞頭汁小雞圓魚
羹小雞二色蓮子羹小雞假花紅清羹攪小雞拂兒笋
燠小雞五味炙小雞小雞假炙鴨紅燒小雞脯小雞五
色假料頭肚尖假炙江瑤肚尖煤肚山藥鷓子鴿子笋
焙鷓子假燒鴨清攪鷓子紅燒鷓子八糙鷓子蜜炙鷓
子鴿子黃雀釀黃雀煎黃雀辣鹿野味清供野味假炙
野味鴨盤兔糊燒野味清攪鹿肉黃羊獐肉炙犯兒赤

蟹假炙鱸橙醋赤蟹白蟹辣羹蚱蜢簽蚱蜢辣羹溪蟹
奈香盒蟹辣羹蟹簽糊齏蟹振醋洗手蟹釀振蟹五味
酒醬蟹酒溼蟹生蚱子燥肚燥子蚱橙醋蚱五辣醋蚱
子明芽肚蚱子膾酒燒蚱子蚱子辣羹酒鴿鮮蛤蜊
淡菜淡菜膾改汁辣淡菜米脯鮮米脯淡菜米脯風鰻
米脯羊米脯鴿子鮮蛤假燒蛤蜊肉葷素水龍白魚水
龍江魚水龍肉水龍腰子假溲菜腰子假炒肺羊燒下
飯假牛凍假驢事件凍蛤蜊凍雞凍三鮮凍石首白魚

凍鮑鮑假蛤蜊三色水晶絲五辣醋羊生膾十色事件

凍三色炙潤鮮粥蜜燒齋肉炙犯兒江魚炙潤鹿獐肉

炙潤關魚鹹豉十色鹹豉下飯齋肉假燒鴨下飯二色

炙潤骨頭等食品更有供未盡名件隨時索喚應手供

造品嘗不致缺典又有拓盤擔架至酒肆中歌叫買賣

者如炙雞八焙雞紅燒雞脯雞鹿鴨八糙鶩鴨白燂春

鷄炙鶩糟羊蹄糟蟹燒肉蹄子糟鶩事件燒肝事件酒

香螺海腊糟脆筋千里羊諸色薑豉波絲薑豉薑蝦海

蟄鮓腰皮牒子獐犯鹿脯影戲算條紅羊犯槌脯線條
界方條兒三和花桃骨鮮鶩鮓大魚鮓鮮鯉鮓寸金鮓
筋子鮓魚頭醬等鱖魚蝦茸鰻絲地青絲野味腊白魚
乾梅魚乾鱗魚乾銀魚兒乾鱖魚乾銀魚脯紫魚螟脯
絲等脯腊從食葷素點心包兒旋炙犯兒灌燒雞粉羹
科頭攪魚肉細粉小素羹灌肺羊血糊齋海蟄螺頭辣
菜餅熟肉餅羊脂韭餅四時果子圓柑乳柑福柑甘蔗
土瓜地栗麝香甘蔗沉香藕花紅金銀水蜜桃紫李水

晶李蓮子杼桃新胡桃新銀杏花紅紫楊梅銀瓜福李
台柑洞庭橘蜜橘匾橘衢橘金橘橄欖红柿方頂柿火
珠柿綠柿巧柿櫻桃豆角青梅黃梅枇杷金杏此果木
遇時則有歌賣更有乾果子如錦荔木彈京棗棗圈香
蓮串桃條梨旋勝番糖糖霜番葡萄松子巴欖子人面
子嘉慶子諸色韻果十色蜜煎炮螺諸般糖煎細酸四
時像生兒時果春蘭秋菊石榴子兒馬院醞醢乳酪韻
果蜜薑豉皂兒膏輕餚瑪瑙餚十色糖麝香豆沙糰子

又有陳州果兒蜜

闕

柿糖絲梅山糖烏反旋

闕

高巨生

菜筍薑油多糟瓊芝四色辣菜四時細色菜蔬糟藏秋
天有炒栗子新銀杏香藥木瓜橙子等類更有擡床賣
熟羊炙鰍炙鰻炙魚粉鰍等物諸店肆俱有廳院廊廡
排列小小棹便閣兒弔窗之外花竹掩映垂簾下幕隨
意命妓歌唱雖飲宴至達旦亦不妨也

麪食店

向者汴京開南食麪店川飯分茶以備江南往來士夫

謂其不便北食故耳南渡以來幾二百餘年則水土既
慣飲食混淆無南北之分矣大凡麵食店亦謂之分茶
店若曰分茶則有四軟羹石髓羹雜彩羹軟羊煑腰子
鹽酒腰子雙脆石肚羹猪羊大骨雜辣羹諸色魚羹大
小雞羹攪肉粉羹三鮮大廬骨頭羹飯食更有麵食名
件猪羊盒生麵絲雞麵三鮮麵魚桐皮麵鹽煎麵筍撥
肉麵炒雞麵大廬麵子科澆蝦燥麵煨汁米子諸色造
羹糊羹三鮮棊子蝦燥棊子蝦魚棊子絲雞棊子七寶

棊子抹肉銀絲冷淘笋燥齏淘絲雞淘耍魚麪又有下飯則有焙雞生熟燒對燒燒肉煎小雞煎鶩事件煎襯肝腸肉煎魚煤梅魚鮓鯽雞鵪豉汁雞焙雞大燒燂魚等下飯更有專賣諸色羹湯川飯并諸煎肉魚下飯且言食店門首及儀式其門首以枋木及花樣脊結縛如山棚上掛半邊猪羊一帶近裏門面窗牖皆朱綠五彩裝飾謂之驩門每店各有廳院東西廊廡稱呼坐以客至坐定則一過賣執筋遍問坐客杭人侈甚百端呼索

取覆或熱或冷或溫或絕冷精澆燒呼客隨意索喚
各卓或三樣皆不同名行菜得之走迎廚局前從頭唱
念報與當局者謂之鐺頭又曰著案訖行菜行菜詣竈
頭拓盤前去從頭散下盡合諸客呼索指揮不致錯悞
或有差錯坐客白之店主必致叱罵罰工甚是逐之有
店舍專賣餛飩店如大燒餛飩大燥子科澆蝦燥絲雞
三鮮等餛飩并賣餛飩亦有專賣菜麵熟齋笋肉淘麵
此不甚尊重非君子待客之處也又有專賣素食分茶

不悞齋戒如頭羹雙峰三峰四峰到底簽蒸果子鼈蒸
羊大段果子魚油燂魚繭兒三鮮奪真雞元魚元羊蹄
梅魚兩熟魚燂油河魷大片腰子鼎煮羊麩乳水龍麩
笋辣羹雜辣羹白魚辣羹飯又下飯如五味燒麩糟醬
燒麩假炙鴨乾簽雜鴿假羊事件假驢事件假前白腸
葱醑油漂骨頭米脯大片羊紅燒大件肉煎假烏魚等
下飯素麩如大片鋪羊麩三鮮麩炒鱔麩捲魚麩笋撥
刀笋辣麩乳瀼淘笋瀼淘笋菜淘麩七寶棗子百花棗

子等麵皆精細乳麩笋粉素食又有專賣家常飯食如
攪肉羹骨頭羹蹄子清羹魚辣羹雞羹要魚辣羹猪大
骨清羹雜合羹南北羹無賣蝴蝶麵煎肉大塊蝦燥等
蝴蝶麵又有煎肉煎肝凍魚凍鮓凍肉煎鴨子煎鱈魚
醋鮓等下飯更有專賣血臟麵齋肉米麵筍淘麵素骨
頭麩笋素羹飯又有賣菜羹飯店無賣煎豆腐煎魚煎
鮓燒菜煎茄子此等店肆乃下等人求食粗飽往而市
之矣

葷素從食店

諸色點心事件附

市食點心四時皆有任便索喚不悞主顧且如蒸作麪
行賣四色饅頭細餡大包子賣米薄皮春繭生餡饅餃
餛子笑靨兒金銀炙焦牡丹餅雜色煎花饅頭棗籬荷
葉餅芙蓉餅菊花餅月餅梅花餅開爐餅壽帶龜仙桃
子母春繭子母龜子母仙桃閣歡喜駱駝蹄糖蜜果食
果食將軍肉果食重陽糕肉絲糕水晶包兒笋肉包兒
蝦魚包兒江魚包兒蟹肉包兒鶩鴨包兒鶩眉夾兒十

色小從食細餡夾兒笋肉夾兒油煤夾兒金鉗夾兒江魚
夾兒甘露餅肉油餅菊花餅糖肉饅頭羊肉饅頭大學
饅頭笋肉饅頭魚肉饅頭蟹肉饅頭肉酸餡子層兒炊
餅鷺旦更有專賣素點心從食店如豐糖糕乳糕粟糕
鏡面糕重陽糕東糕乳餅麩笋絲假肉饅頭笋絲饅頭
裹蒸饅頭波菜果子饅頭七寶酸餡薑糖辣餡糖飯饅
頭活糖沙餡諸色春繭仙桃龜兒包子點子諸色油煤
素夾兒油酥餅兒筍絲麩兒果子韻果七寶包兒等點

心更有饅頭店無賣江魚兒子雜合細粉灌燒軟爛大
骨科頭七寶科頭又有粉食店專賣山藥丸子真珠丸
子金橘水糰澄粉水糰乳糖槌拍花糕糖蜜糕裹蒸粽
子栗粽金鏈裹蒸菱粽糖蜜韻果巧粽豆糰麻糰糍
及四時糖食點心及沿街巷陌盤賣點心饅頭炊餅及
糖蜜酥皮燒餅夾子薄脆油燂從食諸般糖食燂蝦
魚剎子常熟糍糕餛飩瓦鈴兒春餅菜餅圓子湯糰水
糰蒸糰栗粽裹蒸未食等點心及沿門歌叫熟食臘肉

炙鴨燒鵝熟羊鷄鴨等類及羊血灌肺攪粉科頭應于市
食就門供賣可以應倉卒之需

米鋪

杭州人烟稠密城內外不下數十萬戶百十萬口每日街
市食米除府第官舍宅舍富室及諸司有該俸人外細民
所食每日城內外不下一二千餘口皆需之鋪家然本州
所賴蘇湖常秀淮廣等處客米到來市湖州米市橋黑橋
俱是米行接客出糶其米有數等如早米晚米新破礮冬

舂上色白米中色白米紅蓮子黃芒上稗秔米糯米箭子
米黃粳米蒸米紅米黃米陳米且言城內外諸鋪戶每戶
專憑頭於米市做價徑發未到各鋪出糶鋪家約定日子
支打米錢其米市小牙子親到各鋪支打發客又有新開
門外草橋下南街亦開米市三四十家接客打發分俵鋪
家及諸山鄉客販賣與街市鋪戶大有徑庭杭城常願米
船紛紛而來早夜不絕可也且又袋自有債戶肩駝脚夫
亦有甲頭管領船隻各有受載舟戶雖米市搬運混雜皆

無爭差然鋪家不勞於力而米徑自到鋪矣

肉鋪

杭城內外肉鋪不知其幾皆裝飾肉案動器新麗每日各鋪懸掛成邊猪不下十餘邊如冬年兩節各鋪日賣數十邊案前操刀者五七人主顧從便索喚剉切且如猪肉名件或細抹落索兒精鈍刀丁頭肉條攪精攪燥子肉燒猪煎肝肉醬肉禽蔗肉骨頭亦有數名件曰雙條骨三層骨浮肋骨脊齧骨毬杖骨蘇骨寸金骨棒子

蹄子

關

頭大骨等肉市上紛紛賣者聽其分寸畧無錯

悞至飯前所掛之肉骨已盡矣蓋人煙稠密食之者衆故也更待日午各鋪又市燒曝熟食頭蹄肝肺四件雜燒蹄爪事件紅白燒肉等亦有盤街貨賣更有犯鮓鋪兼貨生熟肉且如犯鮓名件最多姑言一二其犯鮓者筭條影戲鹽豉皂角鉗松脯界方條線條糟豬頭肉瑪瑙肉鶯鮓旋鮓寸金鮓魚頭醬三和鮓切鮓挑花鮓骨鮓飯鮓翅脯紅羊犯大魚鮓鯉魚鮓等類冬間添賣

凍薑豉蹄子薑豉雞凍白魚凍波斯薑豉等壩北修義坊名曰肉市巷內兩街皆是屠宰之家每日不下宰數百口皆成邊及頭蹄等肉俱係城內外諸麪店分茶店酒店把鮓店及盤街賣燒肉等人自三更開行上市至曉方罷市其街坊肉鋪各自作坊屠宰貨賣矣或遇婚姻日及府第富家大筵華筵數十處欲收市腰肚頃刻並皆辦集不勞力蓋杭州廣闊可見矣

養鋪

杭州內外戶口浩繁州府廣闊遇坊巷橋門及隱僻去處俱有鋪席買賣蓋人家每日不可缺者柴米油鹽醬醋茶或稍豐厚者下飯羹湯尤不可無雖貧下之人亦不可免蓋杭城人嬌細故也姑以魚鮓言之此物產于溫台四明等郡城南渾水門有團招客旅鮓魚聚集於此城內外鮓鋪不下一二百餘家皆就此上行合撫魚鮓名件具載于後郎君鮓石首鮓望春春皮片魴魴鮓鰱鮓鮓鮓鰻條彎鮓帶鮓短鮓黃魚鮓鯖魚鮓魴鮓老

鴉魚 鯊海裏洋更有海味如酒江瑤酒香螺酒蠣酒蜆
龜脚瓦螺頭酒壠子酒鮑蟹醬蜆蠣鎖官蜆小丁頭魚
紫魚魚膘關子鯖子魷子海水糰望潮滷蝦蜆鱗鯊紅
魚明脯鮓乾比目蛤蜊醬蜜丁車螯江蠟蠶蠟膘腸等
類鋪中亦無賣大魚鮓鱸魚鮓銀魚鮓飯鮓鱖鮓淮魚
乾蜆蚶鹽鴨子煎鴨子煎鱗魚凍要魚凍魚凍鯊炙鮓
炙魚粉鮓炙鰻蒸魚炒白蝦又有盤街叫賣以便小街
狹巷主顧尤為快便耳

夢梁錄卷十六

欽定四庫全書

夢梁錄卷十七

宋 吳自牧 撰

歷代人物

杭城湖光山色之秀鍾為人物所以清奇傑特為天下冠自陶唐至於秦漢晉隋唐之人物彬彬最盛至宋則人物尤盛於唐矣今以歷代杭之人物考之曰陶唐箕公許由隱寓昌化晚溪

明

漢嚴陵光武之

故人不屈於朝隱耕富春山

關

孫堅孫策字

伯符孫瑜字仲異孫

闕

伯陽吳景徐琨

張儼

闕

吳孫興字季

闕

孫鄰字公達孫桓

字叔武郭成字元

闕

金琮字子璜褚泰諸

葛起字岑仕丁諧

闕

晉孫拯字顯世孫惠字德施孫晷

字文度范平字子安文

闕

褚陶字季雅暨孫字茂言

宋

闕

天與吳喜范叔孫

闕

齊顧歡字景怡宋廣之字

處深褚伯玉字元罅杜京產字景齊杜棲字孟山朱謙

之字處先呂道惠

闕

梁范元琰字伯珪范述曾字子元

戚衮字公支褚脩盛紹遠

闕

陳顧越字允南杜之偉字

子大錢達字通甫杜陵子雄盛駱文牙

闕

名牙字旗門

全綬字弘立隋陸知命字仲通顧彪字仲文魯世達

闕

唐褚亮字希明褚遂良字登善南國處士孫彊褚無量

字洪度許遠何公升章成編方宗凌準字宗一吳降字

下已袁不約字還朴杜凌字騰雲吳公納字吳仁羅隱

字昭諫

闕

五代武肅王錢鏐字具美杜建徽字延光成

及字洪濟馬綽鮑君福字慶臣賈圭曹仲遠水丘昭春

吳敬忠孫陟

關

宋忠懿秦國王錢俶字文德錢

關

字延

世錢惟演字希聖錢暄字載陽錢昆字裕之錢易字希

白錢彥遠字子高錢明逸字子飛錢勰字楊父錢繇字

岳南又字岳仲錢藻字仲老薛溫字伯順顧仁冀字子

遷元德昭字明遠元奉宗字知禮元絳字厚之潘閬字

逍遙吳銳林和靖先生諱逋字君復胡則字子正陸滋

字元象孫長者誌不載名與表唐拱楊大雅字子正唐

肅字叔元唐詢字彥獻盛京盛度字公量郎簡字叔康

謝濤字濟之謝絳字希深謝景初字師厚謝景溫字師
立葉杲卿字稱之誌不多載徐復字希顏又表復之俞
舉善楊蟠字公濟沈文通亦不載名以字代之沈遼字
濟達陸闕字介夫關魯開沼字聖淵沈括字存中吳天
祚字平甫強至字幾聖王復字無闕韋驤字子駿周邵
字開祖周邦彥字美成周邦式字南伯虞奕字純臣吳
師仁吳師禮字安中人行先生崔貢字廷碩李軌字彥
淵滕茂實字穎秀史徽字洵美沈晦字元用張九成字

子韶凌景夏字季文樊光遠字茂實郎曄鄭知運字次
張施德操字彥執楊子平誌不載名關注字子東姚真
舊名叔興楊由義字置之俞烈字若晦余古趙輩字子
固俞灝字商卿洪咨夔字舜俞趙汝談字履常趙汝讜
字蹈中李宗勉字強父並歷代英傑文武賢良進士隱
士之秀兼之博學精華忠勇孝義之才或身廉直開事
或職顯而位居三公或歷諫臣忠於大朝或掌軍務而
好墳典或隱而不仕為教尊之師或著諸經子義疏詩

頌

關

表數百篇行於世或建立大功終事中國忠節

盛名青史不朽詳見於臨安志書考其始末昭然矣

文武狀元表

科舉盛代皆舉求賢之詔自宋太祖太宗朝始詔舉
業端拱二年臨軒唱名進士及第狀元文魁陳堯叟
淳化三年孫何真宗朝咸平元年孫瑾二年陳堯咨
景德二年李迪大中祥符五年徐奭八年蔡齊仁宗
朝天聖八年王拱辰景祐元年張唐卿寶元元年呂

漆寶歷二年楊寘六年賈黯皇佑元年馮京五年鄭
獬嘉祐二年張衡四年劉輝六年王俊民八年許將
英宗朝端平二年彭汝礪四年許安世神宗朝熙寧
三年葉洽六年俞中九年徐繹元豐二年時彥五年
黃裳八年焦蹈哲宗朝元祐三年李常六年馬涓紹
聖元年畢漸四年何昌言元符三年李釜徽宗朝
崇寧二年霍端友五年蔡攸大觀三年賈安宅政
和二年莫儔杭人五年何臬八年嘉王宣和三年何

煥六年沈晦

杭人

欽宗朝則無科舉矣高宗朝中興

建炎二年戊子季易紹興二年壬子張九成

杭人

五年汪應辰八年戊子黃公度十二年壬戌陳誠之十

五年乙丑劉章十八年戊辰王佐二十一年辛未趙

達二十四年甲戌張孝祥二十七年丁丑王十朋庚

辰梁克家孝宗隆興元年癸未木待問乾道二年蕭

國梁五年鄭僑八年黃定淳熙二年詹駉五年姚穎

八年王由十一年衛涇十四年王容光宗朝紹熙元

年庚戌余復四年癸丑陳亮寧宗朝慶元二年丙辰
鄒應隆五年己未曾從龍嘉泰二年傅行簡開禧
元年毛自知嘉定元年鄭自誠四年趙建大七年
袁甫十年吳潛十三年劉渭十六年蔣重珍理宗
朝寶慶二年丙戌王會龍紹定二年黃朴五年徐元
杰端平二年吳叔吉嘉熙二年周垣淳祐元年徐儼
夫四年劉夢炎七年張淵徽十年方逢辰寶祐元年
姚勉四年文天祥開慶元年周震炎景定三年方山

京度宗朝咸淳元年阮登炳四年陳文龍七年張鎮
孫

武舉狀元

高宗朝中興南渡誌不載武舉姓氏自於孝宗朝以
後俱可考之淳熙八年江伯虎十一年林嶸十四年
黃褰然光宗朝紹熙元年厲仲祥四年林管寧宗朝
慶元二年周虎五年陳良彪嘉泰二年葉滌開禧元
年鄭公侃嘉定元年周師

杭人

四年林泌浹七年劉

必芳

杭人

十年朱嗣宗十三年陳正大十六年杜幼

節理宗朝寶慶二年楊必高

杭人

嘉熙二年劉必成

淳祐元年趙國華四年項桂發七年張夢飛十年陳

億子寶佑元年程鳴鳳四年章宗德開慶元年朱應

舉景定三年俞葵度宗朝咸熙元年王國四年俞仲

鰲

后妃列女

宋章懿皇后李氏性莊重寡言雖仁宗為己子而后不

曾言中外罔知后薨後方追冊皇太后謚章懿塋永定陵

漢孫策破虜母吳夫人助治軍國甚有補益

徐琨母孫氏定策破英之謀

孫翊妻徐氏守節定謀殺三兇得報夫冤

晉虞潭母定夫人孫氏年少喪偶遺孤誓不改節撫養訓子成義節以尅戰

孫晷妻虞氏棄華尚素與晷同志至孝奉舅姑凡起居

嘗饌不辭新水井臼之勞

孝婦嚴氏事舅姑不失起居供饌之禮舅喪未葬因火沿屋哭告於天孝心有感而火遂滅無傷其棺

唐孝女馮氏少孤獨無兄弟共侍母子相依誓不改嫁以奉母病篤行孝治之不救葬母結草廬墓下朝夕以香燈侍奉又刺血書經報劬勞之恩以宅捨建梵宮薦母仍不嫁以死盡孝義郡臣聞於朝賜東帛旌之勅頒寺額曰報恩為額表其孝矣

節婦何氏年少喪偶志不再嫁奉姑至孝忽賊掠歸巢穴欲污其節義遂定策解襦自刎賊驚視而已死義而葬之

五代吳越國恭懿太夫人吳氏諱漢月性慈惠而節儉頗尚黃老學居常布練而已每侍王決事凡以忠恕為言諸侯遷授皆峻阻多加訓勵無令驕恣

宋吳越忠懿王妃孫氏諱太真性端謹而聰慧延接姻宗以盡恩禮好學詩書嚴重而尚儉守忠以事上國

孝婦盛氏事舅姑盡孝躬紡績烹飪以養侍姑性太急婦禮怡聲下氣每侍立無惰怠娣姒敬順和睦亦皆化之姑病篤貧無資醫救鬻之費執簪珥裙襦而易其供又剗脇取肝為常膳長姒潘氏亦刲股而進姑食而病愈州家長官劉既濟上於朝詔旌表其門閭

凌大淵妻劉氏及笄許嫁請期將至而凌生告卒劉氏聞之告於父母曰兒聞女子以一志為良以死生不易其節兒已許凌今已既喪則吾夫也兒當易服奔喪誓

呼栢舟不更二也父母以女未嘗踐其庭何遽若此兒
答以身許人而背之乎有死而已決無易其志父母懼
其言而從所請易簾衰臨棺舉哀以修婦道守義節以
兄子養為已子與之娶婦至於抱孫白首不易其志也

歷代方士

歷代方士蔡經郭文字文舉葛洪字稚川號抱朴子許
邁字叔元杜子恭徐霸府號默希子錢道士令狐絢丁
飛字翰之潘尊師馬湘字自然管歸真賜號玄靖崇教

法師正白先生沈若濟字子舟號洞玄大師徐立之舊
名炳一號迴峯先生陸維之字永仲又名凝之表子才
號石室先生衷字天誘賜王號悟靜處士徐奩賜號冲
晦先生俱杭之得道仙士有超世之志修真之術或上
升或羽化或葬而解化或羽化後遊於外郡乃真仙隱
化使凡夫俗眼之人茫然不知諸士之詳載於淳祐咸
淳兩志及感應神仙傳中攷之有著百論石室小隱集
行於世矣

歷代方外僧

歷代高僧自宋武帝朝為始僧慧靜慧基慧集法匱淨
度瑜本翼本僧詮道琳旻本明徹法開惠明曇超真宮
宇聖遠號南天竺岳師道欽國一澄悟禪師園修道林
號烏窠禪師會通號招賢禪師齊安號悟空禪師道標
號西嶺和尚慧琳字抱玉交遊前後刺史學士如杜陟
裴常棣陵則楊憑靈元輔白居易李幼崔鄩路異俱造
室講論心要靈照名龍華禪師號真覺大師行修生有

異相耳耳垂兩肩稱長耳相禪師賜號崇慧大師延壽
號抱一子幼在俗誦經感諸少年跪聽後捨業為僧聚
徒講道傳播高麗遣使盡弟子禮奉金線織紫袈裟水
晶數珠金藻罐為獻唐開寶間入滅號智覺大師崇寧
歲追謚宗照禪師闕逢號普覺大師遇安號善智禪師
慶祥九曲禪師行明開化禪師太宗朝賜紫衣師號善
昇元禧年詔註釋御製法音集賜號日觀大師又深於
琴律法照不妄交遊與和靖先生同時僧智圓為友宰

臣王欽若王隨壬化基深敬之崇寧歲賜號法照大師
道誠慧悟大師余弼題上方寺詩曰孤峯牢落幾何年
臺殿於今拂半天已是精藍誇絕徼更將寶塔在危巔
煙霞色任陰晴變鐘磬聲隨上下傳珍重老僧無境

闕

一生幽趣只山川 契嵩字仲靈自號潛子姓李賜號

明教大師熙寧歲季夏入滅以釋氏法茶毘而五根不
壞塔名曰五種不壞之塔 贊寧太平興國春阿育王
舍利朝太宗賜號通慧大師真宗召對賜坐以右街陞

左街僧錄賜號通慧圓明大師 寶達號刹利法師

智圓孤山法師自號中庸子 尊式姓葉字知白崇寧

歲賜號慧通大師掌天台教闕觀紹興間高宗降旨賜

號曰懺慧禪主大法師塔號瑞光思悟每誦咒身出舍

利 元照姓唐字湛如號安忍子賜號靈芝大智律師

宗本字無垢姓管號靜慈圓照禪師神宗召對賜茶

入福寧殿說法詔賜肩輿入內 善本字法誦大師號

哲宗遣中使撫問降香宣賜高嚴磨衲衣勅賜大通禪

師大觀入滅進謚圓定之號塔號定光之塔元淨字無
俗姓徐賜紫衣辨才法師號師生時左肩有肉起如袈
裟條至八十一日方消師之入滅實八十一歲矣 延
壽興教小壽禪師修廣字叔徽自京師至於四方凡公
卿至於學士大夫知其名皆樂從之景祐歲賜紫衣詔
賜寶月大師之號 文益於周顯德時謚封大法眼禪
師塔名無相之號 道潛字參寥嘗與蘇東坡秦少游
兩先生為密交曾詠臨平絕句云風蒲獵獵弄輕柔欲

立蜻蜓不自由五月臨平山下路藕花無數滿汀洲東坡守杭時因參寥人智果精舍賦詩云雲崖有淺井玉醴常半尋遂名參寥泉可濯幽人襟又作參寥泉銘記之歲月東坡愛其詩嘗稱無一點蔬筍氣味體製絕似儲光羲非近世詩僧比崇寧末老江湖既示寂有詩行於世句句清絕可傳法號曰妙總大師懷顯西湖持淨大師嘗撰錢塘勝跡記慧勤有歐陽文忠公賦詩送之曰越俗僭宮室傾貲事雕牆佛屋尤其侈耽耽擬侯

王文彩瑩丹漆四壁金焜煌上垂百寶蓋宴坐以方床
胡為棄不居栖身居京坊辛勤營一室有類燕巢梁南
方精飲食菌筍鄙羔羊飯以玉粒粳調之甘露漿一饌
費千金百品羅成行晨興未飯僧日昃不敢嘗乃茲隨
北客枯栗充飢腸東南地秀絕山水澄清光餘杭幾萬
家日夕焚清香煙霏四面起雲霧雜芬芳豈如車馬塵
鬢髮染成霜三者孰苦樂子奚勤四方乃云慕仁義可
以治膏肓有志誠可嘉及時宜自強人情重懷土飛鳥

思故鄉夜枕聞北鴈歸心逐南檣歸兮能來否送子以
短章同時有惠恩者曾於潛西普明寺智為浴堂記宰
臣王安石賦詩贈之曰綠淨堂前湖水綠歸時正復有
荷花花前若見餘杭姣為道仙人憶酒家 惟尚本姓
曹幼為僧徧參叢林得法於英普照常住壽聖本雪峯
結菴故地有荆榛蛇虺人莫敢居師住八年創立殿廡
為之一新謝歸故廬後住薦福以疾還廬入滅 守璋
俗姓王天姿介特凜不可犯戒行精潔尤工於詩號文

慧禪師有柿園集行於世高宗於紹興二年幸圓覺寺
因覩其集宸翰親洒晚春一絕賜之見圓覺寺刻石於
亭曰山深烟景重林茂夕陽微不雨花猶落無風絮自
飛 德朋姓顧氏字澹堂入徑山講論禪教四年因觀
竹溜以杵通節有聲豁然開悟遂號為竹筍和尚紹興
年兩嘗宣入慈寧殿升座講般若經法高廟奇之賜號
及法衣 清潤字怡然 可久字逸老所居皆湖山勝
景而清約介靜不妄與人交無故不至城士大夫多往

見之就饋米日以一二合食雖蔬茹亦未嘗有故人尤

重同時有

闕

思聰亦似之而詩差優

宗杲字曇晦姓

奚主徑山學徒一千七百衆來者猶未已建千僧閣以

居之號臨濟中興時與張九成為方外交後因誹謗朝

政謂張九成

闕

而宗杲和之

闕

遂編海

外四方衲子忘軀皆往從之續蒙宸恩放便復僧伽梨
往阿育山復居舊山孝宗為吳安郡王遣使入山謁之
以偈獻之後建邸再遣內侍供五百應真請謀法席親

書妙喜庵三字并製讚寵之自後退居明月堂而示寂
孝宗聞而歎息詔以明月堂為妙喜庵謚號普覺禪師
賜塔額曰寶光此僧雖林下人而義篤君親談及時事
憂形於色而垂涕其時名公鉅卿皆稱其才有正法眼
藏等集淳熙初詔隨大藏流行蓋杭之高僧散聖棄儒
成道戒行精潔學問孤高博習教席以訓諸衲著文朝
修懺儀諸經法注宗鏡論心要纂法語觀鬼神以禮問
止朝水而擊西興感羣羊而跪聽墜大星以隕靈鷲列

朝宣講慧號錫傾至於入滅瑞光顯然蓋叢林中素有
儒者之風故與公卿大夫及學士氣味相投皆樂與之
交講論道要題辭詠詩靡不起敬以大藏經高僧傳錢
塘勝跡記臨安新舊誌皆修其詳矣茲不復贅

行孝

陳藏器本草謂人肉可療疾非謂人肉之果能療疾也
蓋以人子一念孝誠出於天性能動天地鬼神故借此
以奏功耳今據杭之外邑行孝若女若子載於新志者

考其姓名述之富陽何氏女子 江陰村盛立旺二子

富陽葛小閨 臨安朱應孫俞延用子亞佛其家祖

大成文延用及其子凡三世行孝矣 臨安錦北鄉陳

茂祖其父母俱病皆療而愈 臨安邑人龔婆兒鹽官

邑人周阿二周小三昌化邑農家子梅來兒已上皆因

父母疾篤百藥罔功思劬勞之恩無報答或剖心或剖

股以常膳而進之莫不愈之於此可見孝為百行之原

天地神明亦為之佑助矣

夢梁錄卷十七